

मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना



मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना

मकबूल शाह क़ालुवार्य सुंज़ लीछिमुन्न मसनवी
दास्तान-ए-गुलरेज़

Source: 'Gulrez' - compiled by Mohd. Yousuf Teng and 'Kashmiri Zaban Aur Shairi, Vol: 3' - authored by Abdul Ahad Azad, publications of J&K Academy of Art, Culture & Languages, Srinagar.

Condensed & Rewritten in Devanagari-Kashmiri by M.K.Raina

Work completed on 1.1.2005. Updated 15.11.2005

परिचय

मसनवी गुलरेज़ को कश्मीरी साहित्य में एक उत्तम स्थान हासिल है। मकबूल शाह क़ालुवारी की यह मसनवी कश्मीरियों में जितनी लोकप्रिय हुई, उतनी और कोई मसनवी नहीं हो सकी। यद्यपि मकबूल शाह क़ालुवारी से पहले महमूद गामी ने फारसी साहित्य की दूसरी प्रसिद्ध रचनायें जैसे यूसुफ जुलेखा, लैला मजनून, शीरीं खसरौ आदि को कश्मीरी पैरावे में ढाल कर मसनवी को एक ऊंचा स्थान दिलाया, लेकिन मकबूल शाह की यह रचना उन सब से भिन्न और उन सब से ऊपर है। गुलरेज़ के बारे में मुहम्मद यूसुफ टेंग साहब लिखते हैं कि यह मसनवी वास्तव में कश्मीरी साहित्य की दुल्हन की मांग का टिका है। इस बात से भी किसी को इनकार नहीं कि मकबूल शाह की यह रचना मूल फारसी रचना से भी बहुत आगे निकल गई है। टेंग साहब के खयाल में जिन साहित्यकारों ने मकबूल के बाद भी फारसी रचनाओं को कश्मीरी ज़बान में पेश किया, वह भी मकबूल की बराबरी नहीं कर सके।

गुलरेज़ की दास्तान मूलतः फारसी भाषा में ज़िया उद्दीन नख्शबी ने लिखी है। यह दास्तान इतिहास से सम्बन्धित कोई घटना नहीं है बल्कि एक काल्पनिक कथा है। मकबूल शाह क़ालुवारी ने इस दास्तान को कश्मीरी काव्य का रूप कब दिया, निश्चित रूप से कुछ नहीं कहा जा सकता। एक अनुमान के मुताबिक मकबूल शाह ने गुलरेज़ १८८७ में लिखी जब उन की आयु लगभग ५० साल की थी। कुछ लोगों का खयाल है कि उन की मृत्यु १८९७ में हुई जब वह तकरीबन ६० साल के रहे हूंगे। लेकिन हामदी कश्मीरी के खयाल में मकबूल शाह १८२० में पैदा हुए और १८५५ में ३५ साल की छोटी आयु में ही चल बसे। एक और प्रसिद्ध साहित्यकार अब्दुल अहद आज़ाद का कहना है कि मकबूल शाह की मृत्यु १८७५ में हुई।

मकबूल शाह का जन्म बडगाम तहसील में नागाम के निकट एक गांव क़ाल वारी में हुआ। उन के पिता का नाम ख्वाजा अब्दुल कदूस था। मकबूल को पीर मुरीदी का काम अपने पिता से विरासत में मिला लेकिन अपनी बीमारी की वजह से वह इस काम में पूरा ध्यान न दे सके। मकबूल शाह को मिली जागीर में दो तीन गांव भी थे लेकिन वहां के निवासी खुद बहुत गरीब थे। इसलिये उन की तरफ से भी मकबूल शाह को कोई राहत नहीं मिली। नतीजा यह हुआ कि कोई खास आमदनी न होने की वजह से उन्हें ज़बरदस्त गुरबत ने आ घेरा। अपनी बेचारगी को मकबूल शाह ने कुछ इस तरह ज़ाहिर किया है :

मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना

*पज़रान गुलन आरवलन हाय गरीबी
गाशस छे करान गट, तापस छाय गरीबी*

मकबूल शाह की दरिद्रता का यह आलम था कि छोटी मोटी मदद के लिये भी वह सरकारी अफसरों के पास कविता में लिखी हुई याचना लेकर जाते और उन्हें सुनाते। इस सिलसिले में उन की कविता के रूप में लिखी हुई एक याचना जो फारसी भाषा में लिखी गयी है, बहुत मशहूर है। यह याचना उन्होंने ने एक सरकारी मुलाज़िम पंडित अमर नाथ को पेश की थी जिस में उन्होंने ने अपनी फसल को महफूज़ करने के लिये सरकार से प्रार्थना की थी।

गरीबी से तंग आकर मकबूल शाह ने आखिरकार थोड़े में ही गुज़ारा करना सीखा और अपनी किस्मत को ईश्वर के हवाले कर दिया:

*यि म्याने कुसमतु तँम्य आसि ल्यूखमुत
ति वात्यम तँस्य अथ्यन येम्य आसि जोखमुत*

मकबूल शाह बचपन से ही बीमार रहते थे। बाद में उन्हें टी बी हुआ। वह दूध और फालूदा खाकर गुज़ारा करते थे। समय गुज़रते उन का जिगर भी कमज़ोर होने लगा। अपने अंतिम दिनों में वह नमक भी नहीं खा सकते थे। अपने दुख का हाल उन्होंने कुछ इस तरह से बयान किया है:

*इल्लतौ छुस हेरि ब्वन आवुरमुतन
ज़िल्लतन मँसीबतन तल ह्योतमुतन
कांह ति म्वकुलन पाय छुम नु ज़े सिवा
या मुहम्मद मुसतफा बख़्शुम शफा*

गुरबत, लाचारी और बीमारी के अलावा भी कुदरत ने मकबूल शाह के लिये बहुत कुछ लिखा था। बहुत समय तक मकबूल के अपनी कोई औलाद नहीं हुई। मजबूर होकर उस ने अपने भतीजे मुस्तफा शाह को गोद लिया। मुस्तफा शाह भी उच्च स्तर की शायिरी

मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना करता था। उस की एक कविता से लिये गये यह पद उस की मधुर रचनाओं का अनुमान कराती हैं।

मस चाँवुथस मयखानु, जानानु यहम ना ।
व्यसुराँवुथस मस्तानु, जानानु यहम ना ॥
मे रोय होवुथ दूरि दिल ह्यथ च़ोलुहम च़ूरो ।
फलवा गँयस देवानु, जानानु यहम ना ॥
कस निशि लोगुय रस, किथु त्राँवुथस बेकस ।
बेगानु छी हमखानु, जानानु यहम ना ॥

मगर अभी मुस्तफा शाह पूरी तरह खिल भी नहीं पाया था कि कुदरत ने उसे १८-२० साल की आयु में ही इस दुनिया से उठा लिया। मुस्तफा शाह की मृत्यु से मकबूल की हालत और भी खराब हो गई। उन की बिगडती हालत का अंदाज़ा उन की मसनवी से ही ली गई इस पंक्ति से बखूबी होता है:

शगूफस शीन गुलज़ारस कृहुन प्योम

या

हॉदुर लॉगिथ नेंदुर पाँविथ च़ोलूहम, फिराका ललवुन थॉविथ च़ोलूहम
खरीदारो कम्म्यू बाज़ारु छारथ, मे तावन पोवथम कमि वानु गारथ

इस तरह की ज़िंदगी गुज़ारते हुये भी मकबूल शाह किस तरह गुलरेज़ जैसी शाहकार मसनवी लिख सके, इस बात पर सब को हैरत हैं। शोहरत और लोकप्रियता के लिहाज़ से कश्मीरी साहित्य में मसनवी गुलरेज़ का वही स्थान है जो फारसी शायिरी में जामी की यूसुफ जुलेखा और निज़ामी की शीरीन खसरौ को हासिल है, या दीवानों में दीवाने हाफिज़ शीराज़ी को हासिल है। कश्मीरियों में गुलरेज़ कितनी लोकप्रिय हुई, इस का अनुमान इस बात से लगाया जा सकता है कि १९४६ तक इस मसनवी के १८ संस्करण बिक चुके थे। तब से लेकर आज तक इस किताब के कितने ही और संस्करण छप कर बिक चुके हैं।

मकबूल शाह क़ालुवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

मुस्तफ़ा शाह की असमय मौत से मकबूल शाह टूट चुका था। शायद कुदरत की तरफ से भी उन की यह हालत न देखी गई और आगे चल कर उस के अपने दो बच्चे हुए, एक लडकी और एक लडका। लडकी की शादी कलाशपोरा, श्रीनगर के एक पीरज़ादा खानदान में हुई थी। लडके का नाम पीर अली शाह था। कहते हैं मकबूल शाह की मृत्यु के समय पीर अली शाह की आयु केवल ६ महीने की थी। इस बात से यह अंदाज़ा लगाया जा सकता है कि मकबूल शाह ६० साल की आयु में नहीं बल्कि ३५ साल की आयु में ही गुज़र गये हूंगे और गुलरेज़ भी उन्होंने छोटी आयु में ही लिखी होगी।

गुलरेज़ के अलावा मकबूल शाह ने जो रचनाएँ लिखी, उन में ग्रीस्य नाम, बहार नाम, पीर नाम, मनसूर नाम व यूसुफ जुलेखा प्रसिद्ध हैं। अब्दुल अहद आज़ाद ने उन की दूसरी कविताओं का संग्रह कुलियाते मकबूल के नाम से भी प्रकाशित किया है। कहा जाता है कि मकबूल शाह ने आब नाम, बे-बूझ नाम और नार नाम नाम से तीन और किताबें लिखी हैं, मगर उन का कोई अता पता नहीं है। गुलरेज़ केवल मकबूल शाह का सब से बड़ा कारनामा ही नहीं है बल्कि कश्मीरी साहित्य में भी इसे एक ऐसा स्थान हासिल है जिस की बराबरी शायद ही कोई और मसनवी कर सके।

मकबूल शाह क़ालुवारी की मसनवी गुलरेज़ पूरी की पूरी काव्य रूप में है जिस की भाषा मिश्रित कश्मीरी और फारसी है। हम गुलरेज़ की कथा को संक्षिप्त कश्मीरी गद्य रूप में ढाल कर आप के सामने प्रस्तुत कर रहे हैं ताकि देवनागरी-कश्मीरी पढ़ने वाले लोग भी मकबूल शाह की इस रचना का आनन्द ले सकें। मसनवी के कुछ ऐसे महत्वपूर्ण पद जो कश्मीरी भाषा में हैं और जो कहानी की निरंतरता को बरकरार रखने में सहायक हैं, उन को कहानी में शामिल किया गया है। इन पदों को शामिल करने का एक उद्देश्य यह भी है कि पढ़ने वाले को असली मसनवी की मधुर शैली का कुछ हद तक अंदाज़ा हो जाये।

इस मसनवी में एक कविता उस घटना को दर्शाती है जब कहानी की नायिका नोश लब नींद से जाग जाती है और नायक अजब मलिक को पास में न पाकर विलाप करती है। यह प्रसिद्ध कविता 'सुबुह फोल, बुलबुलव तुल शौरो गौगाह, गॅयस बेदार मुच्चर्यम चेश्मे शहला', जिसे कश्मीरी काव्य में एक उच्च स्थान हासिल है और जो कश्मीरियों में बहुत ही लोकप्रिय है, इस संक्षिप्त रूपांतर में भी पूरी की पूरी पढ़ने को मिलेगी। प्रसिद्ध लेखक श्री टी.एन.कौल इस कविता के बारे में लिखते हैं :

“(It is) a masterpiece of sorts and the most splendid example of his (Karalwari's) art, which has remained unsurpassed so far. The 60 odd couplets

मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना

deftly absorb and express the passionately intense yearning, pain and anguish ever suffered by a woman in Kashmir's literary history, Habba Khatoon and Arnimal notwithstanding."



दास्तान-ए-गुलरेज़

👁️ माँसूम शाह तु ख्वश रंग जानावार 👁️

नखशब शहरस मंज़ ओस अख बादशाह। नाव ओसुस तैफूर शाह। तैफूर शाहस ओस माल जादाद स्यठाह मगर औलाद ओसुस नु कांह। औलादु सुंदि खॉतरु रुद सु दूहस रातस ख्वदायस कुन ज़ारु पारु करान। ऑखुरकार गॅयि तसंज्ञ मुराद पूर तु तस ज़ाव अख लॅडकु।

*दुआ तॅम्य सुंद सपुन अज़ हक इजाबथ
कोरुन तस ताज़ु फरज़ंदाह इनायथ
थनु प्यव माजि निशि ज़न काजकुय रौ
वुछिथ तैफूर शाह मसरूर क्याह गौ*

लॅडुकस आव नाव थवनु माँसूम शाह। शाहज़ादु ओस स्यठाह जॅहीन। तस आयि थदि कुसमुच तरबियथ दिनु तु सॉरी ह्वनर तु कमाल हेछिनावनु। अकि दूह ओस सु अख रॅगीन महफिल सजॉविथ बिहिथ:

*दूह अकि मजलिसाह रॅगीन व आला
वॅरुन बरपाये बा अरकानि वाला
ज़ि हर गुनाह मय्यसर ऑश थोवुन
रबाबो मतरबो मय मंगुनोवुन*

मॅजलिसि मंज़ ऑस्य साज़ वज़ान तु ख्वश यिवुन्य नगमु ऑस्य जॉरी। अँथ्य मंज़ पेयि माँसूम शाहस पशस कुन नज़र। अति वुछुन अख ख्वश रंगु जानावार बिहिथ।

*दरीचि किन्य कोरुन बामस नज़ारा
अजब ख्वश रंग उचूतुन जानवारा*

मकबूल शाह क्रालुवार्य सुंज मसनवी दास्तान-ए-गुलरेज - नवि सरु लेखन वोल : म.क.रैना

शाहज़ादस आव यि जानावार स्यठाह पसंद तु सु गव तस रटनु खॉतरु बेताब। दरबार्यव येलि शाहज़ाद सुंज बेकरॉरी वुछ, तिमव ह्योत सु जानावार रटनुक संज करुन। दरबार्यव वॅर्य तस रटनु खॉतरु रंगु रंगु छल। कुसमु कुसमुक्य दानु त्रॉविहॅस, मगर जानावार लोग नु ज़ालस।

*दोपुस फीरिथ वॅज़ीरव ऐ जहांदार
करव क्याह अॅस्य रटनु अॅम्य सुंद छु दुशवार*

व्वन्य ह्योत जानावारन वुडव करनुक संज करुन। शाहज़ाद गव ज़्यादय बेकरार। तॅम्य ह्योत पनुन वछ चेटुन। सु गव यकदम थोद वॅथिथ। तसुंदिस ताजस लॅज ग्राय तु तमि मंज़ु पेयि कॅह म्वख्तु दानु पथर। म्वख्तु वुछिथ तुज जानावारन वुफ तु वोथ म्वख्तु खेनु खॉतरु ब्वन कुन।

*वुछिथ दुरदानु बोर जानावारन चाव
गुज़ा तस ओस ती, तथ प्यठ वॅसिथ आव*

जानावार सुंद हाल वुछिथ सपुद दरबार्यन इतमीनान तु तिमव वोन शाहज़ादस कुन, 'व्वन्य त्रॉवि व तोह्य वसवास। असि लोब अॅमिस जानावार सुंद ख्वराक। व्वन्य छु यि रटनु स्यठाह आसान।' दरबार्यव वाहरोव ज़ाल तु तथ मंज़ थॅविख म्वख्तु पॅल्य। जानावार लोग म्वख्तु खेनि तु दरबार्यव रोट सु ज़ालस अंदर।

*ब-रगबत जानुवारन म्वख्तु ह्योत ख्योन
ज़ि तमाहे खाम नफसन ज़ालु लोगुन*

अमि पतु आव सु जानावार अॅकिस पंजरस मंज़ बंद वॅरिथ थवनु। शाहज़ादु मॉसूम शाह छु व्वन्य दुनियाह त्रॉविथ अॅमिस जानावार सुंदिस पंजरस ब्रॉटु कनि ब्यहान तु तस मुदय गॅडिथ वुछान रोज़ान। कॅह काल गॅछिथ त्रोव जानावारन ख्यन चन। शाहज़ादन अनुनॉव्य रंगु रंगु म्वख्तु तु दितिन तस खेन्य। मगर जानावार सपुद नु किहिन्य ति ख्यनस तयार।

मकबूल शाह क्रालुवार्य संज मसनवी दास्तान-ए-गुलरेज - नवि सरु लेखन वोल : म.क.रैना

मॉसूम शाह सपुद स्यठाह गमगीन। तॅम्य ह्योत दूह तु रात वदुन। जानावारन येलि मॉसूम शाहुन यि हाल वुछ, तॅम्य ह्योत तस इनसानन हुंघ पॉठ्य मोदरि ज़बानि मंज पृछुन ज़ि च़े क्याज़ि त्रोवुथ म्यानि खॉतरु दुनियाह तु गरुबार।

🌀 जानावार छु पनुन हाल बावान 🌀

जानावारन वोन मोसूम शाहस ज़ि हरगाह बु पनुनि असल शक्लि मंज आसुहॉ, बु करुहॉ शाहज़ादु सुंद गम दूर। मगर बु छुस वुन्यक्यन जानावारु सुंदिस सूरतस मंज, बु क्याह ह्यकृ तॉरीफव वरॉय वॅरिथ। जानावारस इनसानु सुंघ पॉठ्य कथु करान वुछिथ गव मॉसूम शाह हॉरान। तॅम्य वोन जानावारस ज़ि सु बॉविन पनुन हाल।

दोपुन तस जानवारस बहरे लिल्लाह
सिरस पनुनिस मे करतम वारु आगाह

जानावारन कोर कॅह वनुनस साफ इनकार:

दोपुस तॅम्य जानवारन तोर फीरिथ
वनय क्याह सिर पनुन, गछि फाश नीरिथ
मे खद मारख, जुदा अज़ तन गछ्यम सर
ति छुम बेहतर, तु सिर बावुन नु बेहतर

शाहज़ादु सुंद इसरार रूद जॉरी। मगर जानावार गव नु पनुन सिर बावुनस तयार:

वुनिस तामथ कोरुम नु कांह खबरदार
च़ु छुख तवु निश दूहन दून च़्वन हुंदुय यार
वनय खद सिर पनुन बूज़िथ ह्यकख नु
च़ु हरगिज़ ताबेह फहमीदन अनख नु

मकबूल शाह क्रालवार्य संज मसनवी दास्तान-ए-गुलरेज - नवि सर लेखन वोल : म.क.रैना

*बु खदवय बावु बा मुरदम पनुन हाल
गछन सँगीन दिल वॉलिंजि परकाल*

शाहज़ादन ह्योत नु पथ केह। येलि नु तँम्य थफुय तुज, जानावार सपुद मजबूर तु ह्योतुन वनुन:

*बु पँज्य किन्य दूखतरे शाह पँरी छस
बर वँरमुच्च च़ेय ही अँक्य जाफरी छस*

‘बु छस पँरिस्तानुकि शहर बैयतुल-अमानुच बादशाह कूर। नाव छुम नोश लब। मॉलिस छुम नाव मशहूर शाह तु माजि छुम नाव गुलबदन बेगम।’ यिथु पॉठ्य सपुज नोश लबि हुंज कथ शुरू।

🌀 नोश लबि हुंज कथ 🌀

तुरकिस्तानस मंज ओस शाह बहगर्द नावुक अख बोड बादशाह। तस ओस अख नेचुव यस नाव ओस अजब मलिक।

*प्रजलवुन र्वख तसुंद जन माहे ताबां
वुछिथ काकल तसुंद सुंबल परेशान*

अजब मलिक ओस बेयन शाहज़ादन खोतु ज़्यादु ऑकुल। तस ओस मजलिस आरॉयी करनुक स्यटाह शोख तु रँफीकन तु ऑकुलन मंज ब्युहुन ओस तस सख पसंद। अकि दूह ओस सु यिथय पॉठ्य मजलिसि मंज बिहिथ जि तस सपुद कमुक ताम गमंड।

*ब-खॉतिर गव तँमिस यिछ बजमे बे गम
मे रोस्तुय आसि कुस वोथमुत ब आलम*

मकबूल शाह क्रालुवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

वँज़ीरन कुन दोपुन छुव बूज़मुत ज़ांह
मे ह्यू छा ओसमुत कांह शाह ज़ादाह

वँज़ीरव कॅरिहॅस स्यठाह तॉरीफ। दोपहॅस अज़ ताम छुनु कांह अखाह ति दर दुनिया च़े ह्यू वोथमुत। अमि पतु हेत्य तिमव प्रथ आयि अजब मलिकुन्य तॉरीफ करुन्य। तसुंदि हुस्नुक्य तॉरीफ, तसुंदि कदुक्य तॉरीफ, तु तसुंजि अक्लि हुंघ तॉरीफ। अजब मलिक ओस तॉरीफ बूज़िथ स्यठाह ख्वश। मगर मजलिसि मंज़ ओस अख बुडु शख्साह। तस ओस नु वँज़ीरन हुंज़ि कथि सुत्य यितिफाक। तॅम्य वोन वँज़ीरन जि तुहुंद वनुन छु सोरुय गलत। अगर तोहि पॅज्य पॉठ्य काँसि हुंदि हुसनुक्य तॉरीफ बोज़ुन्य छिवु, तेलि बूज़िव मे निशि।

सिफत हुस्नुक्य मे निश तुह्य बूज़्यतव व्वन्य
दपन कथ हुस्न, दम दिथ बूज़्यतव व्वन्य
ब आलम छुस नु वुन्यक्यन कांह ति साँनी
बनेमुच़ तस छे हुस्नुच़ मेहरबाँनी

अमि पतु हेत्य बुडु शख्सन अँकिस ज़नानि हुंघ तॉरीफ करुन्य। तसुंद हुस्न, तसुंद कद, तसुंघ र्वखसार, तसुंघ ज़ूल्फ, तसुंद ड्यक़, तसुंज़ु बुम, तसुंज़ु च़ेश्मु, तसुंघ वुठ, तसुंघ दंद, तसुंघ गरदन, तसुंद सीनु, तसुंघ अथु, तसुंद कमर, तसुंघ कोठ्य, ज़ंगु तु ख्वर, गरज़ प्रथ कुनि तानुक्य तॉरीफ हेत्य तॅम्य तमि आयि करुन्य जि बोज़न वॉल्य गॉयि मसहूर।

बुर तिमु च़ेश्मु डीशिथ गॅय यँबरज़ल
च़ॅलिथ गॅयि हरनु, हांगल लॅग्य ब जंगल
अवेज़ान छिस प्रज़लवुन्य गोशि वाराह
निवान तिम ग्रायि सुत्यन होश वाराह
तसुंज़ गरदन वुछिथ शर अँज़ुन्यन गव
ख्यवान अफसूस, वन रॅट्यमुत्य छि हरनव

मकबूल शाह क्रालुवार्य सुंज मसनवी दास्तान-ए-गुलरेज - नवि सरु लेखन वोल : म.क.रैना
तमि पतु वोन तँम्य बुडु शखसन जि तस हुस्नुचि पॅरी छु नाव नोश लब तु दुनियाहस मंज
छुनु कांह तस बराबर ।

अजब मलिकन येलि नोश लबि हुंद नाव तु तसुंदि हुस्नुक्य तौरीफ बूज्य सु गव देवानु ।

*ति बूजिथ गव स्यठाह शहजाद बेताब
खयाले ऐश-ने-शाँदी गव तँमिस खाब*

तसुंदिस दिलस मंज आव गॉयबानु पॉठ्य नोश लबि हुंद लोल बरनु । तस रोव दिलुक
स्कून तु बेकरार सपदिथ प्रुछ तँम्य बुडस तमि मुल्कुक नाव येति नोश लब रोजान ऑस ।
बेयि यि जि स्व छा आदम किनु पॅरी ?

🌀 शाहजादस छु नोश लबि हुंद लोल सँनिथ गछान 🌀

बुडन येलि शाहजाद सुंद इसरार वुछ, तँम्य द्युतुस जवाब:

*दोपुस तँम्य बुड्य, जज़ीरस मंज छु मुल्खाह
तम्युक आबो हवा बिसियार दिल खाह
पॅरिस्तानाह अजायिब दर जहां छुय
ज्यतस थव नाव तथ बैयतुल-अमान छुय
पॅरी पैकर बसान तथ जायि गाहस
दपान मशहूर शाह छुख नाव शाहस
कुनी छस कूर यस छुस नोश लब नाव
ति बूजिथ शाहजादन कूत बोर चाव*

अजब मलिक सपुद नोश लबि हुंद दर्शुन करनु खॉतरु व्वन्य बेताब । तस रोव दिलुक करार
तु सु ह्योतुन नोश लबि हुंदिस लोलस मंज देवानु गछुन ।

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

व्वलो माशोक मोरुस दूरिरन चॉन्य
कोरुस अज़ दिल बु आवारु उचकु लॉन्य
मे न्यूथम चूरि दिल रुज़िथ च़े दूरे
ललवुन छुम ज़लवुन नार मूरे

अजब मलिकुन्य हालत वुछिथ द्युत बादशाहन तसुंजि दिल बहलॉयी खॉतरु साज़ो नगमुच महफिल सजावनुक होकुम। सेतार व संतूर लॅग्य वज़नि मगर शाहज़ादस लोग नु कुनि सुत्य दिल। तस ऑस सिर्फ नोश लब अँछन तल। शाहज़ाद ओस खून हारान तु व्यदाख दिवान। तॅम्य अननोव बुडु शख्स बेयि नाद दिथ तु कोरनस ज़ारु पारु जि नोश लबि हुंज वनतम बेयि कांह कथाह। शाहज़ाद सुंज हालत वुछिथ सपुद बुडस स्यठाह अफसूस। तॅम्य वॅर पानस मलामत जि मे क्याज़ि वॅन्य नोश लबि हुंज कथ शाहज़ादस। व्वन्य गोछुम नु शाहज़ाद सुंद मार खसुन मटि:

करेयम क्याज़ि यिछ कथ पार यथ आम
च़ैजिम कथ प्वख्त ऑसिथ द्रास बो खाम

बुडन ह्यँच शाहज़ादस गांगल करनु खॉतरु तस अख नॅव दॅलील बोज़नावुन्य, मगर शाहज़ाद ओस नु बेयि किहिन्य बोज़नु खॉतरु तयार। सु ओस सिर्फ नोश लबि सुत्य मुलाकात करनुस बेकरार।

व्वलो अँशको अँछन अंदर करय जाय
मे कोरथम क्याह गमुक ज़ोलानु दरपाय

च़ु ख्वदवय आशकन प्यठ तीर त्रावख
ब यक तीरे निगाह लछ खून हारख

अजब मलिक रूद द्वहस रातस नोश लबि मुतलिकुय सौंचान तु रिवान। तसुंज हालत हेच़ुन वारु वारु खराब सपदुन्य। तसुंघ सॉरिय वॅज़ीर क्योहो रॅफीक गॅयि तस समजावुनस मंज़ तु अमि नारु मंज़ कडुनस मंज़ नाकाम। अजब मलिकस ऑस अकॉय कथ सनेमुच़

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

ज़ि मे कर सपदि पनुनिस माशोकु सुंद दीदार। अमि वरॉय ओस नु सु किहिन्य ह्यकान
सूचिथ।

छाव गुल रोयि गुलज़ार, हाव दीदार लँतिये
थाव कन बोज़तम ज़ार, हाव दीदार लँतिये
सु चोन ऑयीनु र्वखसार, वुछिथ गँय गुल ति मँतिये
मे थोवथम बर जिगर खार, हाव दीदार लँतिये

आखुरस गव यिमय नालु दिवान दिवान अजब मलिक ब्यमार तु प्यव दर बिस्तर। नैदुर
रॉवुस तु ख्यन चन मोठुस। दूह पतु दूह ह्योतुन तस पान ह्वखुन। वँज़ीरव कँर बादशाहस
शेछ।

खबर दिज़ शाह बहगर्दस वँज़ीरव
जिगर गोशि तुहंद बेमार अज़ गव

बादशाह आव लारान लारान। शाहज़ादु वोथ नु मॉलिस वुछिथ थोद कैह तु न कोरनस
तसलीम। तस ऑस्य जामु चँटिथ तु बुथिस मातम। नेचिव सुंद हाल वुछिथ ह्योत
बादशाहन अँछव किन्य खून हारुन। तँम्य बुलोव अख दाना तु कॉबिल हँकीम मँहल
खानस मंज़।

कोरुन रॉही हँकीमे तेज़ दॉनिश
चु वुछतस नब्ज़ करतस आजमॉयिश

हँकीमस ओस स्यठाह तजरुबु। तँम्य वुछ शाहज़ादस नब्ज़। हेरि प्यठु ब्वन ताम दिचनस
नज़र। मगर शाहज़ादस मंज़ आव नु कुनि कुसमुक कांह जिस्मॉनी दोद लबनु। हँकीमस
ओस नु शाहज़ादु सुंद अँदरिम दोद मोलूम। तँम्य ह्योक नु शाहज़ादस यलाज कँरिथ।

हँकीमस अँकुनुय दोद गव नु मोलूम
यलाजुच वथ लँबुन नु गव सु महरूम

मकबूल शाह क्रालवार्य संज मसनवी दास्तान-ए-गुलरेज़ - नवि सर लेखन वोल : म.क.रैना

शाहज़ादन वोनसः

दोपुस तँम्य ऐ तबीबे तेज़ फितरत
यियी कर अँशुकु दौदिस रास हिकमत
मे अँशुकुन दोद छुम क्या यथ छु चारु
ज़ि दरदे यार गोमुत छुस अवार

हँकीमस येलि शाहज़ादु सुंदि असली दाद्युक पय लोग, सु गव बादशाहस यि शेछ बावनि । बादशाहन प्रुछुस अम्युक यलाज । हँकीमन वोनस ज़ि कांह त्युथ रँफीक गछि शाहज़ादस निश सोज़नु युन, युस तस निशि यि राज़ नोन कडि । येलि यि पताह लागि ज़ि शाहज़ादस कसुंद अँशुकु दोद छु, तेलि ह्यकव तसुंदि दाद्युक यलाज छौँडिथ । बादशाहन बुलोव अख दाना वँज़ीर । दोपुनस, च़ु गछतु शाहज़ादु सुंद ह्मदर्द बँनिथ तु तस निशि अनतु तसुंदि दाद्युक राज़ वँडिथ ।

❁ वँज़ीर छु शाहज़ादस समखान ❁

वँज़ीर वोत शाहज़ादस निशि तु लोग यि मोलूम करनि ज़ि शाहज़ादस वँम्यसुंद दोद छु । माय लॉगिथ वोनस ज़ि मे करतु पनुनिस सिरस वॉकफ ।

वोन वँज़ीरन शाहज़ादसः

गोमुत कस छुख च़ु आशक बावतम सिर
करन च़ेय ब्रौठकुन दरहाल हौज़िर
बु वालन आसि य्वद प्यठ आसमानस
दिमय छौरिथ अँनिथ सौरिस जहानस

मकबूल शाह क्रालवार्य संज मसनवी दास्तान-ए-गुलरेज़ - नवि सरु लेखन वोल : म.क.रैना

वॅज़ीरु संज़ि रफावॅक़ सुत्य गव शाहज़ादु नर्म। तॅम्य बाँव स्व साँरुय दॅलील वॅज़ीरस, ख्वसु तॅम्य बुडस निशि बूज़मुत्र ऑस। वॅज़ीर गव हॉरान तु परेशान। तॅम्य ओस न तस बादशाह सुंद नाव ज़ांह बूज़मुत तु न काँसि नोश लबि हुंद। वॅज़ीरस गव यकीन ज़ि बुडन छि शाहज़ादस अपुज़ दॅलीलाह वॅन्यमुत्र। तॅम्य ह्योत शाहज़ादु समजावुन।

वुनिस ताम काँसि हुंज़ि ज़ेवि छुनु द्रामुत
न नामे नोश लब दर गोश चामुत
गुमान छुम बुड्य गलत वोनमुत छु बे शख
अजब मलिकस ति बूज़िथ खॅत्र स्यठाह च़ख

अजब मलिकुन्य च़ख वुछिथ वोन वॅज़ीरन शाहज़ादस कुनः

दुबारु शाहज़ादस दोप वॅज़ीरन
छु कर शायान शाहन तय अँमीरन
ज़नानन हुंद रटुन दर दिल मुहब्बत
कनव बोजुन गछुन बरबाद तथ पथ

शाहज़ादस गव नु वॅज़ीरु सुंदि समजावुनु सुत्य कांह असर। शाहज़ादु रूद पनुनि कथि प्यठ डॅटिथ। वॅज़ीरन लॉज तस ज़नानन हुंज़ि बे वफॉयी प्यठ अख दॅलील वनुन्य।

👁 हज़रत ईसा तु जवान 👁

दपान अकि दूह ओस हज़रत ईसा वति पकान। अँकिस जायि वॉतिथ वुछ तॅम्य अख मरगुज़ार तु पोरुन तति फातेह। मरगुज़ारस मंज़ वुछुन अख जवान इनसाना वदान। जवान ओस स्यठाह कमज़ोर तु नोतवान। वॅद्य वॅद्य आसु तस अँछ स्वतेमचु तु बासान ओस ज़ि दूखव दाद्यव छु सु पूर पाँठ्य वोलमुत। हज़रत ईसा गव तस जवानस ब्रॉठकुन तु प्रुछनस

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना
वदनुक वजह। जवानन दोपुनस मे ऑस टॉठ तु रॅफीक ज़नानु, स्वय गुज़रेयम। बु छुस
तसुंदि दादि गोलमुत तु तवय छुम मातम।

व्वं छुस प्रारान कजा कुनि किन्य यियम ना
ब-जल्दी तस रॅफीकस निश नियम ना
तॅमिस रोस्तुय यियम क्याह जुव मे दरकार
तॅमिस रोस्तुय लसुन म्योनुय छु दुशवार

जवानु सँद्य व्यदाख बूज़िथ आव हज़रत ईसा हस स्यठाह आर। जवानस दोपुन जि मे हाव
स्व कबर येति स्व दफन छि। यि बूज़िथ तंबुल्यव जवान। तस डॅल्य मगुज़ तु रोवुस
ह्यसुय। अँथ्य मन्नरस मंज़ कोर तॅम्य अँकिस कबरि कुन इशारु।

हज़रत ईसा गव तथ कबरि प्यठ तु कोरुन म्वरदु जिंदु। कबर प्रॉटिथ द्राव तमि मंज़ु अख
यहूद्य। यहूद्य सुंद जिस्म ओस दज़ान नारस मंज़ तु बदन ओसुस सियाह गोमुत। यि वुछिथ
पुछ हज़रत ईसाहन तस जि च़ु कथ प्यठ छुख यिथिस अज़ाबस लोगमुत।

दोपुस तॅम्य तोर या ईसा वंदय जान
गोमुत ओसुस जि दुनिया ना मुसलमान
च़ु ओनुनख खॉलिकन व्वन्य म्यानि बापथ
दपुम वॅलिमु च़ल्यम द्यव दागि लानथ

हज़रत ईसाहन परुनोव यहूद्य वॅलिमु तु बनोवुन मूमिन। अमि पतु पुछ हज़रत ईसाहन
जवानस जि च़ु ओसुख वनान अथ कबरि मंज़ छि चॉन्यज़नानु, तु कति छय? च़े वोनुथु
मे अपुज़, किनु कबर हॉवथम गलथ? जवानन दोपुस, बु ओसुस डोलमुत तु मे हॉव गलथ
कबर। अमि पतु हॉव जवानन हज़रत ईसाहस असली कबर। हज़रत ईसा गव तथ कबरि
निशि तु वॅरुन दुआ। कबरि मंज़ु द्रायि अख खूबसूरथ ज़नानु न्यबर। जवानस पयूर बुथिस
रंग तु बॉच़व द्यव बोर अख अँकिस स्यठाह लोल।

मकबूल शाह क्रालुवार्य संज मसनवी दास्तान-ए-गुलरेज - नवि सरु लेखन वोल : म.क.रैना

जवानन तस दोपुन माशोक म्याने,
मे ऑसिम पारु गॉमृत्य दादि चाने

जवान तु तसुंज ज़नानु युथुय गरु कुन हेतिन पकुन्य, तिमन गॅयि पादशाह सुंद सिपाह नज़रि। अमि मुल्कुक शाहज़ादु, यस सॉरिस नाव ओस, ओस गरदिश वॅरिथ वापस मॅहल खानस कुन पकान। तस पेयि जवानु संजि ज़नानि प्यठ नज़र। तसुंद हुस्न वुछिथ सपुद शाहज़ादु बेताब। हुपॉर्य पेयि तस ज़नानि ति शाहज़ादस कुन नज़र तु तस ति गव दिल नीरिथ। शाहज़ादन वोन जवानस जि च़ु छुख च़ूर। च़े दिच़ुथ मॅहल खानस सन। यि ज़नानु छि म्यॉन्य वॅनीज़ तु च़े छथन यि म्यानि महलु खानु मंज़ु च़ूरि नीमुच़।

जवानस शाहज़ादन दोप च़ु छुख च़ूर
दिच़ुथ सन मॅहल खानस, छा यि दस्तूर

जवानन गँड्य शाहज़ादस गुल्य। दोपुनस बु छुस नु च़ूर। यि छि म्यॉन्य ज़नानु तु यि ऑस स्यठाह कालुच मूमच़। अज़ हॉव ख्वदायन पनुन्य क्वदरथ तु वॅरुन यि जिंदु। शाहज़ादस खोत सख ख़ाम।

दोपुस शाहज़ादन ऐ दुज़दे तबाहकार
मूलय अज़ जानि ख्वद छुय नु यिवान आर
तुलुस थफ वथ पनुन्य रठ नतु मारथ,
अथु त्राव व्वन्य नतु बरदार खारथ

जवानन त्राँव ज़नानि कुन नज़र मगर स्व ऑस यीतिस कालस फीरिथ गॉमुच़। तमि वोन शाहज़ादस जि बु छस पॅज्य पॉठ्य शाहे आलम संज वॅनीज़। बु अँनिनस येम्य च़ूरन मॅहल खानु मंज़ु च़ूरि वॅडिथ। यि बूज़िथ च़ॅज जवानस ख्वरव तलु म्यॅच़ नीरिथ।

ज़नानि हुंज कथ बूज़िथ ह्योत जवानन पनुन वछ च़ेटुन मगर ज़नानि गव नु कांह असर। स्व द्रायि शाहज़ादस सुत्य। जवान पोक ज़नानि पतु पतु तु ह्योतुन अँछव किन्य खून हारुन।

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

रिवाँनी तस कुनथ लोग करनि विलुज़ार
पेयस शायद दिलस रहमा यियस आर

मगर ज़नानि प्यठ गव नु तसुंदि विलुज़ारुक कांह असर। स्व द्रायि शाहज़ादस सुत्यु तु पथ कुन दिद्युन नु नज़र ति। जवानन ह्योत स्यठाह वदुन। अमि पतु गव सु बैयि हज़रत ईसाहस निशि तु वॅनिन तस सौरुय दॅलील। यि कथ बूज़िथ गव हज़रत ईसा स्यठाह हॉरतस। सु द्राव जवानस सुत्यु तु वोत तस ज़नानि निशि। हज़रत ईसाहन दोप तस ज़नानि:

खबर छयि कुच खॉरी तुजुन ज़ेय पथ
पतव लाकन च़ु द्रायख बद तॅबीयथ
परन प्यस बेयि यि अॅमिसुय कुन टिकॉनी
अॅमी दॉवुय दुबार जिंदुगॉनी

ज़नानि वॅर हज़रत ईसाहस निशि ति स्वय अपुज़ कथ बयान जि बु छस पादशाह संज्ञ वॅनीज़ तु अॅम्य जवानन ऑसुनस बु च़ूरि नीमुज़।

अॅमिस सुत्युन बु शाहज़ादन प्रज़नस
बदौलत खानु पानस सुत्यु अॅनिनस

यि बूज़िथ तुल हज़रत ईसाहन आसमानस कुन अथु तु कोडुन तस ज़नानि वोहव। ज़नानु पेयि वॅसिथ तु बनेयस म्यॅज़।

🌀 वँज़ीर छु शाहज़ादस समजावान 🌀

दँलील बोज़नॉविथ वोन वँज़ीरन अजब मलिकस जि वुछ तु तँम्य जवानन कुच्चाह खॉरी तुज तस ज़नानि खॉतरु, मगर हॉसिल क्याह आस ? ज़नानु छि बे-वफा आसान तु तस छनु माय रोज़ान ।

*ज़नानाह होल तु स्योद बोज़िय नु हरगिज़
ज़नानव अँनिमत्य दाना छि अँजिज़*

अमि पतु लोग वँज़ीर तस नँसीहथ करनि जि च़े छथन नु नोश लब ज़ांह वुछमुच़य तु न छुय तसुंद हुस्न वुछमुत । तैलि कथ प्यठ छुख च़ अफसूस तु आह करान ? मगर अजब मलिकस गव नु असर कैह । तँम्य वोनस दर जवाब जि माशोक ख्वदवय बे वफॉयी ति करि, आशकु संज कॉम छे वफा करुन्य ।

*छ्वकु लद गोस दिल छुम होशि डोलमुत
बु छुस तस यारु संज़ी मायि वोलमुत
दिमस फँरियाद लायस नाद यारस
कत्यथ छुम वतु वुछान पतु लारस*

वँज़ीरस तोर फिकिरिह जि शाहज़ाद छुनु काँसि हुंज कथ मानन वोल । सु द्राव वापस तु गव बादशाहस शाहज़ाद सुंद हाल बावुनि । बादशाह गव यि बूज़िथ स्यठाह परेशान । तँम्य अँन्य साँरी दाना तु काँबिल वँज़ीर साँबरिथ तु पुछुनख जि काँसि छा दर दुनिया नोश लबि हुंद नाव बूज़मुत ? तिमव द्युतुस जवाब जि अँस्य छि कोहिस्तानन, समंदरन, माँदानन, जंगलन, गरज़ दुनियाहुकिस प्रथ अंदस फेरान रोज़ान । असि छु बिसियार मुल्कन हुंद साँर कोरमुत, मगर यि नाव छुनु असि कुनि ति जायि कनन गोमुत । पादशाह गव यि बूज़िथ स्यठाह गमगीन तु ह्योतुन अफसूस ख्योन ।

मकबूल शाह क्रालुवार्य सुंज मसनवी दास्तान-ए-गुलरेज़ - नवि सर लेखन वोल : म.क.रैना

कुनुय ओसुम कुनी वॉजिम वुनु मे
स्व नय आस्यम दिलुक राहत छुनु मे

❁ पादशाह छु शाहज़ादस निश यिवान ❁

पादशाह वोत खून हारान अजब मलिकस निशि। तँमिस कोरुन दिलासा मदारा। सुती
कँरुनस नँसीहथ।

अँछन हुंदि गाशि हा ख्वश बाशि म्याने
यि क्याह ओसुय च़े ल्युखमुत करम लाने
च़ु वनतम ऑश राहत क्याज़ि त्रोवुथ
ह्योतुथ मातम तु खलवथ खानु प्रोवुथ

पादशाह गव वनान। 'च़ु हरगाह दुनियुहुक कांह ति ऑश आराम वनख, सु करय मय्यसर।
हरगाह ज़ून छांडख, स्व वालन बु चानि खॉतरु तारख ह्यथ ज़मीनस प्यठ। मगर यसुंद च़े
लोल सन्योय, तसुंद छुनु कांह नेबाह निशानाह। अगर च़ु तोति वनख, बु सोज़न पनुन
सोरुय लशकर तस छांडुनस। तिम दिन वँन्य सॉरिसुय आलुमस तु करन कूशिश तसुंद
कांह पय पताह कडुनस। मगर च़ु संबालतु पनुन्य हालत। मे छि चॉन्य सूरथ वुछिथ
दिलस खंजर वसान।'

शाहज़ादन द्युतुस जवाब:

छु लॉजिम आशकन लारुन अँछव किन्य
ब हर दम खूने दिल हारुन अँछव किन्य
ख्वरव सुत्यन पकुन छुनु शर्ते यॉरी
ब सर लारुन छु शर्ते दोस्तदॉरी

मकबूल शाह क्रालुवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

पादशाह गव स्यठाह दिल मलूल। तँम्य वोनस बेयि:

खबर च़े छय दौयुम मा छुम मे गोबराह
कुनुय च़ ओसहम वनतम च़े गोय क्याह
तवक्काह ऐ पिसर ओसुम मे चोनुय
च़ थावख ज़िंद मेय पतु नाव म्योनुय
करख बर तख्ते शाँही कामराँनी
रटख मालो खज़ानु जाय म्यौनी

शाहज़ादस गव नु असर कैह मगर पादशाह रूद तस कुन वनान। दोपुनस 'ऐ म्यानि टाटि गोबरु! च़ छुख ना वुछान म्यौन्य ज़िंदगी छि आँखरी पडावस प्यठ वॉचमुच़। बु कोताह नोतवान छुस सपुदमुत। नर्यन जंगन छुम जुव द्रामुत। मे छु व्वन्य श्रावुनस पोह सपुदमुत। खबर कुस साथ आस्यम, येलि मे मोत तुलिथ नियि। म्यानि पतु छय यि ताजदाँरी चाँनी। च़े कर शूबी फलवा तु आशक गछुन। चोन वजूद छु सिरिफ पादशाँही लायख।'

यि कर ज़ोनुम च़ त्रावख मुल्क तय माल
यि कर ज़ोनुम गछख युथ खस्तै अहवाल

शाहज़ाद अजब मलिकस गव नु मॉल्य सुंजव कथव सुत्य् कांह असर। सु ओस सिरिफ नोश लबि हुंज कथ बोज़नु खॉतरु तैयार। बाकय दुनियाह ओस तँम्य त्रौवमुत। मॉल्य सुंजु कथु बूज़िथ गव अजब मलिकस तलवास। दोपुनस 'ऐ शाहे जवान बख्त! मे हिविस आशुकस कथ छु ताजो तख्त बकार। म्यौन्य वथ छे बदल। मे छुनु बादशाँही सुत्य् कांह वासतय।'

यिमु कथु बूज़िथ वसु पादशाहस दिलस श्राकु। तँम्य होत अँछव किन्य खून हारुन तु वदान वदान वोनुन शाहज़ादस बेयि:

च़ थावुम कन करय बो रुच़ नँसीहत
मतो चलतम हेतो अमि अँशकु निशि पथ

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

थरे म्याने वु ओसुख दूर अड फोल
वुछान ओसुस च़े कर वारि फोली गुल
कवो कोरथो च़े म्यॉनिस श्रावुनस माग
बरय गोहम तु थोवथम बर जिगर दाग

शाहज़ादस गव मॉल्य सुंदि ओश त्रावनु सुत्यू स्यठाह असर। दिल सपदुस स्यठाह रंजीदु। दोपुन मॉलिस जि ख्वदा थेंविनय मूजूद। बु यछा पानय पानस खॉरी करुन्य। मे ओस नु कांह खॉहिश यि दोद पालुनस। कांह येछ्या नारस मंज़ पनुन पान ज़ालुन ? बु ओसुस पानु सबरुकुय चारु छांडान, मगर पज़र गव यि जि अँम्य अँशकन छुनम नु कांह होश थोवमुत। अमी छम नु चॉन्य कथ दिलस सनान:

बु ज़न मूदुस तु शाह ओसिन सलामत
ब नेकी जिंद रुज़िन ता कयामत
कोरुस लाचार अँशकन छुम नु तकसीर
मे लीखिथ दर अज़ल यी ओस तकदीर
मे अँशके नोश लब गव होश डॉलिथ
फिराकुक्य आतशन थोवुनस बु ज़ॉलिथ

पादशाह रूद शामस ताम तस समजावान मगर अजब मॅलिक गव नु योरुकिस आलुमस फेरुनस तैयार। पादशाह ओस नु तस त्रावनु खॉतरु तैयार, मगर तसुंद हाल वुछिथ ति ओसुस वॉलिंजि ज़्यतु प्यवान।

शाहन दोपुनस छुहम चेश्मन हुंदुय गाश
कत्यू त्रावथ मे हो छम चॉन्य बँड आश

यि वॅनिथ द्राव पादशाह वछ च़ेटान वापस।

मकबूल शाह क्रालुवार्य संज मसनवी दास्तान-ए-गुलरेज - नवि सर लेखन वोल : म.क.रैना



अजब मलिक छु रासखस राज बावान



अजब मलिकस गॅयि राथ गुजारुन्य बडु मुश्किल । तॅम्य सूज पनुनिस दूदु बाँयिस रासखस शोछ तु वॅनिन तस सौरुय दॅलील । दोपुनस बु छुस यछान वुन्य नोश लब छांडनु खॉतरु नेरुन मगर पादशाह छमु नु हरगिज इजाजथ दिनस तैयार । व्वन्य छुहम च्युय योत रॅफीक ।

रॅफीकय छुख तु करतम गम गुसॉरी
छु यी दस्तूरो शर्ते दोस्त दॉरी
च्यु पखतम सुत्य करतम मेहरबाँनी
करुम यॉरी छुहम योद यारे जाँनी

रासख गव तसंज हालत वुछिथ तस सुत्य गछनु खॉतरु तैयार । अजब मलिक गव ख्वश । तॅम्य सूज बेयि ति कैचन रॅफीकन सुत्य यिनु खॉतरु पाँगाम तु ह्योतुख सफुरस नेरनुक संज करुन ।



अजब मलिक छु सफरस नेरान



ऑखुरकारु वोत सु दूह येलि अजब मलिक द्राव पनुन्यु यार दोस ह्यथ नोश लब छारनु बापथ सफरस । गुर्यन आव माल तु खजानु बरनु । रॉत्य रातस, कुनि जायि थख दिनु वरॉय रूद्य तिम पकान तु सुबहस गाश पवलनु वख्तु वॉत्य तिम ऑकिस बियाबानस मंज । पकान पकान ऑस्य सारिनुय ख्वरन हठ खॅतमुत्य । काँसि ओस नु ताब या ताकत रूदमुत । अजब मलिक ओस वुनि ति नोश लबि हुँदिस फिराकस मंज अछव किन्य खून हारान ।

वनान ओस तालेहस कुन क्याह मे कोरथम
फिराककि नार सुत्यन सीनु बोरथम

मकबूल शाह क्रालुवार्य सुंज मसनवी दास्तान-ए-गुलरेज - नवि सरु लेखन वोल : म.क.रैना

त्रे क्याह कोरुमय बु कोरुथस खस्तु खॉतिर
जि शॉही दौलतस कोरथस मुसॉफिर

वॅरियाह अख गव यिमन पकान। ऑखुरस येलि कूठ सफर वॅडिथ अजब मलिकुन्य सॉथी
छेनिथ पेयि, शाहज़ादस बास्यव जि तिहुंद ब्रॉह कुन पकुन छु स्यठाह मुश्किल। गुर्यन ति
रुज़ नु बोर तुल्य तुल्य कांह सूरथ। अजब मलिकन कोर रासुखस सुत्स सलाह मशवरु।

वनय बु मशवरु यद म्योन बोज़ख
मे सुती कालुचन हुशार रोज़ख
गछव ज़य ज़ॅन्य रॅफीकन चूरि नीरिथ
ह्यमव वथ यिम गछन दर खानु फीरिथ

मगर रासुखन मॉन्य नु अजब मलिकुन्य कथ। दोपुनस चूरि नेरुन गव नु जान। सफर छु
मुश्किल। हरगाह कुनि कांह खतरु आव तु क्याह करव। येति छु नज़दीखुय अख दॅरियाव।
अॅस्य गछव तूर्य। सामानु त्रावव नावि मंज़ तु नेरव दॅरियावु मँज़ी सफुरस। यिथु पॉठ्य
लगि वख्त ति कम।

अजब मलिकस बासेयि रासखु सुंज कथ ठीक। सामानु तु गुर्य आयि नावि मंज़ त्रावनु।
अदु सपुद समंदॅरी सफर शुरू। येति येति बॅस्ती ऑसुख नज़रि गछान, तति तति ऑस्य
तिम नाव बॅठिस लॉगिथ बस्ती मंज़ अचान तु नोश लबि मुतलिक पताह करान। ख्वशकी
प्यठ पकान ओस तिमन अख वॅरियाह लोगमुत। समंदरस मंज़ पकान गव बेयि अख वॅरी।
मगर हॉसिल नदारद।

👤 नाव छि समंदरस मंज़ यीरु गछान 👤

अजब मलिकन कोर बेयि सॉच तु वोनुन रासुखस। ज़ु वॅरी गॅयि असि व्वन्य पकान। यिमन
दून वॅरियन कोड नु असि अकिस पॅहरस ति थख। छुना सलाह, बेयि खसव बॅठिस प्यठ

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सर लेखन वोल : म.क.रैना

वापस तु बाकय सफर कडव ख्वशकी पेठिय। यिथु पॉठ्य ह्यकव बेयि प्रथ जायि वॅन्य दिथ। वुनि ऑस्य तिम यि कथ सॉचानुय जि ज़बरदस्त वाव कोडुन। समंदरस आव तूफान। यिहुंज़ नाव आयि तूफानस मंज़ ह्यनु तु गॅयि यीरु। तथ सुती फॅट्य अजब मलिकन्य सॉरी सॉथी ति पॉनिस मंज़, सामानु ति तु गुर्य ति।

मगर अजब मलिकस ओस नु वुनि क्वदरतन मोत ल्यूखमुत। तस लोग अख पचि तख्ताह अथस मंज़। सु खोत अॅथ्य तख्तस प्यठ। अकि तरफु ओसुस जुव अथस क्यथ जि बु बचा किनु मरु। दोयिमि तरफु ओसुस पनुन्यन सॉथियन हुंदि मरनुक गम।

वदान ओस मुबतला छुस दून गमन मंज़
लोगुस कोत क्याह बन्योम ओसुस कमन मंज़
न बूजुम यार सुंद पॉगाम नै नेब
पनुन्य यिम सुत्य ऑसिम गॉम तिम गॉब

अजब मॅलिकस ओस हालि बद। योत ताम नज़र ऑस पिलान, पोनी पोन्स ओस नज़रि गछान। दूर दूर ताम ओस नु कांह जुव या कांह जिंदु जॉन्न नज़रि गछान। अजब मॅलिक कूतिस कालस रूद पचि खंजि प्यठ यीरान, तम्युक लोग नु तस कांह अंदाज़ु। ऑखुरस वोत सु यीरान यीरान अॅकिस जुविस प्यठ। बॅटिस प्यठ खॅसिथ आव अजब मलिक पथर लायिनु। तस प्यव पनुन रॅफीक रासख याद युस समंदर बुज्य ओस गोमुत।

सु रासख गोम कोत युस यार ओसुम
सिरन महरम गमन गम ख्वार ओसुम

🌸 अजब मलिक छु मकानस अंदर अज्ञान 🌸

अजब मलिकन वॅर वारु वारु ह्यमथ तु ह्योतुन ब्रॉठ कुन कदम ह्युन। बुथि ऑस नु कुनि कांह बॅस्तियाह नज़रि गछान। अजब मलिक रूद दूह वादन पकान। ऑखुर वुछ तॅम्य अॅकिस जायि अख शांदार मकानु। शाहज़ादु गव कॅछा ख्वश तु कॅछा रूदुस दिलस खोफ।

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

मकानस निश वॉतिथ द्युतुन आलव मगर कांह सपुद नु ज़ॉहिर। अजब मलिकन सूंच जि मकानु आसि खॉली। सु चाव मकानस अंदर। अति वुछ तॅम्य अख शूबुन तु लूबुन तुल तख्त। तख्तस प्यठ ओस कुस ताम शॉगिथ। अजब मलिकन तुल खोचान खोचान तस नफरस वुरुन थोद। अँछन ब्रॉह कनि गॅयस ज़न नारु ब्रेह पॉदु। तख्तस प्यठ ऑस अख हूर शॉगिथ। अजब मलिकन ओस नु अज़ ताम युथ हुस्न वुछमुत। यि ऑस पॅज्य पॉठ्य ज़न तु जनतुच पॅरी। अजब मलिकस आव खयाल, यिहय मा छे नोश लब ?

ज़नानु गॅयी बेदार। अख नव जवानाह ब्रॉटु कनि वुछिथ गॅयि स्व हॉरान। दोपुनस, च़ कुस छुख तु योत किथु पॉठ्य वोतुख ? योत छुनु कांह जानावार ति ह्यकान वॉतिथ। मे छु बासान च़ छुनख पनुन्य मोतन योर वातुनोवमुत। येति वापस फेरुन छु चोन स्यठाह दुशवार। अजब मलिकन वोनुनस:

*छुनुम वावाह मे तकदीरन ब-नागाह
गोमुत छुस मारु वनतम चारु छुम क्याह
मुसाफिर छुस तु योत अलगॉबु वोतुस
मगर बर गश्तु बख्तुकि नेबु वोतुस
अर्ज छुम चानि खँजमच कर तु इनसाफ
कुनी जॅन्य क्याजि छख सिर बावतम साफ
दोयुम कांह छुय नु सुत्यन यार हमदम
गज़ा क्याह छुय पनुन्य रुवदाद वनतम*

अजब मलिक ओस हॉरान। 'यथ शिन्याहस मंज़ न छु कुनि ज़न तु न ज़ॉपुन। बु आस यीत्य मॉदान तु जंगल च़ॅटिथ, मगर कुनि गोम नु कांह ज़ीव ज़ॉच़ाह नज़रि।' तॅम्य प्रुछ तस ज़नानि जि ख्यनु चनु वरॉय किथु पॉठ्य छख च़ु ज़िंदु ? ज़नानि द्युतुनस जवाब 'चे छुय बद गुमानु। दय छु सारिनय रिज़्क सोज़न वोल। मे ति सोज़ि सुय येम्य बु योत वातुनावनस तु येम्य बु ज़िंदु थॅवनस।

❁ मुसाँफिर तु जानावार ❁

जनानि बोजुनोव अजब मलिक अख दॅलील। दोपुनस अख शख्साह ओस। अँमिस ओस अँकिस शहरस गछुन। गरि ओस द्रामुत तेल ख्यथ। पकान पकान गोस स्यठाह गर्म। आराम करनु खॉतरु त्रोवुन अँकिस कुलिस तल डाफ। अख तेल फोल ओस अँमिस शख्सस दंदस मंज रुदमुत। अँमिस पेयि प्चंद तु तेल फोल गव दंदु मंजु न्यबर नीरिथ तु प्यव पथर। अख जानावार ओस कुल्य लंजि प्यठ बिहिथ। तँम्य युथुय तेल फोल वुछ, सु वोथ लंजि प्यठु ब्वन तु न्यून ख्यथ। यिथु पाँठ्य ख्वदा साँबन तस जानावारस रिज्क सूज, तिथय पाँठ्य छु सु प्रथ अँकिस सोजान।

अजब मलिकस रुद नु जनानि हुंज कथ बूजिथ ताब। दोपुनस मे वनतु वारु, चु क्वसु छख ? चु छखु इनसान किनु पॅरी ? अथ सिरस करतम वाँकुफ।

❁ नाज मस्ति हुंज दॅलील ❁

मकानस मंज योसु खूबसूरत जनानु काँद आँस, तस ओस नाव नाज मस्त। यि आँस नोश लबि हुंज दूद बेनि। नाज मस्त आँस अँक्य जिनन काँद वँरमुच। नाज मस्ति वँन्य अजब मलिकस जिनु सुंज दलील। दोपुनस बु छस पादशाह कूर। मॉलिस छुम नाव सिपाह सालार तु सु छु मुल्के बहरीनुक पादशाह। म्यानि बेयिस बेनि छु नाव मस्त नाज। अँस्य छि बाबु साँबन लोलु सान रँछिमत्य। बु आँसुस पनुन्यन व्यसन हुंज जिठ तु सर्दार। बु आँसुस अकि दूह व्यसन सुत्य गिंदान। मे आँस्य कुमती ज़ेवर तु पलव नाँल्य। अमी वख्तु गव आसमाँनी अख जिन पाँदु। तँम्य तुजुनस बु ज़मीनु प्यठ तु हवाँयी वुफान वातुनावुनस यथ जुविस मंज। येति वँरुनस यथ मकानस अंदर काँद। म्यानि हालुच छनु मँहलु खानस मंज काँसि ति खबर। व्वन्य वोतुम अक वँरी यथ काँद खानस मंज बंद। नजाथ लबनुच छम नु कांह सूरथ नज़रि गछान।

मकबूल शाह क्रालुवार्य संज मसनवी दास्तान-ए-गुलरेज - नवि सरु लेखन वोल : म.क.रैना

जबरदस्ती निशि रँछिनस ख्वदायन
मिनथ थँवनम जदन प्यठ तँम्य ख्वदायन
अमारथ छय यि तस अफरीतु संज जाय
छु सरकश काँसि हुंद कैह छुस नु परवाय

नाज मस्ति हुंज कथ बूजिथ चाव शाहजादस लरजु। तस पयूर बुथिस जर्द रंग तु दिलस प्योस सख गम। अजब मलिकन ह्योत चलनुक संज करुन मगर नाज मस्ति द्युतुनस आलव। दोपुनस मे वुछ अकि वुहुर्य इनसानु बुथ। छुना सलाह, रछाह बेहख मे निशि। अख कडख थख, बेयि करख मे सून्य कथाह बाथाह। मगर अजब मलिक ओस बांबुर्योमुत। दोपुनस मे छनु येति रोजनुच फरागथ। दिलस छुम फ्रठ, यिनु ओरु जिन यियि तु मौरिथ त्राव्यम। नाज मस्ति दोपुनस, जिन छु वुन्य वुन्य द्रामुत। वुनि छुस वापस यिनस वारियाह वख। लिहाजा त्राव च लरजु तु पख ब्रोंठ कुन।

ग्वडुन्य वन व्रय पनुन्य सौरुय हँकीकथ
कम्यू म्वखु पेश आँयी यीच मेहनथ
कम्यू बाँयिसु वोलुख यथ मकामस
बँरिथ किथ चाख पानय काँद खानस

अजब मलिकन वोनस बु छुस तुरकिस्तानुक रोजन वोल। बु ओसुस अमि मुल्कुक शाहजादु। मगर मे त्रौव ताजो तख्त पनुन माशोक छारनु बापथ। व्वन्य वॉतिम जु वँरी तस छारान मगर तसुंद छुम नु कांह पय पताह अथि लगान। अमि पतु वँन्य अजब मलिकन तस पनुन्य सौरुय दलील जि किथुपॉठ्य द्रास बु नोश लब छांडनु खॉतरु सफरस तु किथु वोलुस बु पतव लाकन नाव पॉटिथ यथ मकामस।

द्वहस रातस यिमन माहन तु वँरियन
कोरुम गरदिश बियाबानन तु शहरन
न थॉवम कांह ति जाया कांह मकानु
तसुंद कुनि शायि ड्यूटुम नु निशानु

मकबूल शाह क्रालुवार्य संज मसनवी दास्तान-ए-गुलरेज़ - नवि सरु लेखन वोल : म.क.रैना

नाज़ मस्त गॅयि नोश लबि हुंद नाव बूज़िथ ख्वश। दोपुनस यि मुसीबथ त्रे पथ कुन तुलुथ,
सु मॅशराव। च़ वोतुख व्वन्य बराबर मकामस प्यठ। चानि खुशी हुंद मोकु आव। बु ज़ानन
नोश लब। स्व गॅयि म्यॉन्य दूद बेनि। अँस्य छि यिकुवटु बडेमुत्य् तु तमि छु म्यानि माजि
दूद चोमुत। अजब मलिकस फ्यूर यि बूज़िथ रंग। दोपुनस मे बोज़नावतु वारु तोह्य कति
समखेवु पानुवॅन्य।

*शिनासॉयी गॅयी कति वारु वनतम
गछ्यम दिल शाद अज़ खॉतिर व्रल्यम गम*

नाज़ मस्ति वॅनिनस नोश लबि सुत्य् मेलनुच दॅलील।

🌀 नोश लबि हुंदि ज़्यनुक हाल 🌀

दोपुनस अकि दूह ऑस म्यॉन्य मॉज म्यानि बेनि मस्त नाज़ि क्वछि क्यथ रॅटिथ ल्वलु मतु
लाय करान। अमी सातु गॅयि तस ब्रॉटु कनि अख पॅरी शक्ल ख्वश पोश ज़नानाह पॉदु।
अँमिस ज़नानि ऑस्य शूबिदार ज़ेवर लॉगिथ। तमि वॅर म्यानि माजि कुन अदबु सान
सलाम। म्यानि माजि ति वॅरनस वापस सलाम। स्व ज़नानु बीठ म्यानि माजि ब्रॉटु कनि।
मस्त नाज़ नीनस अथु मंज़ु तु हेतिन तस म्वन्य तु मीठ्य करुन्य। अमि पतु ह्योत तमि
म्यानि बेनि पनुन दूद चावुन। म्यानि माजि वोनुनस, मे वनतु च़ु क्वसु छख, नाव क्याह छुय
तु योर किथु पॉठ्य आयख ?

पॅरी शक्ल ज़नानि ह्योत वनुन। बु छस पॅरियन तु जिनन हुंज़ बादशाह बाय। नाव छुम
गुलबदन। अँकिस ज़ुविस मंज़ु छु अख शहर यथ बैयत-उल-अमान नाव छु। तत्युक
बादशाह च़ु मशहूर शाह, युस ज़्यनु प्यठय छु पॅरियन हुंज़ सरदॉरी करान। बु छस तसुंज़ुय
ज़नानु। येमि दूह त्रे यि कूर ज़ायी, तमि दूह ऑसुस बु येमी जायि मँज़्य पकान। तमी सातु
वोत मे ति बचु ज़्यनुक वख। बु गॅयस लाचार। मे त्रोव पानस परदु तु माँथुर पॅरिथ च़ायस

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

यथ गरस मंज। मे ज़ायि अख कूर। तमि पतु तुज मे स्व तु वातुनॉवुम पनुन गरु। नाव कौरुमस नोश लब। तसुंज सूरथ वुछिथ छु मे ख्वश गछान दिल। मे छि तमी दूह चॉन्य यि कूर ति वुछमुच़ तु अँम्य सुंज माय छम दिलस गनेमुच़। अमी आयस अज़ लारान लारान अँम्य सुंदि लोलु योर, नतु आसुनम गरि शुर्य बॉच़ प्रारान।

यनु स्वय नोश लब ज़ायम च़े नखु तल
तनु प्रथ सातु ऑसुम यूर्य कुन कल
हद नीरिथ मे अँम्य सुंद छुम महबथ
वुनिस तामथ मूलय आयम नु फ़रसथ

यि बूज़िथ दोपुनस म्यानि माजि जि बु ति वुछहँन चॉन्य कूर। गुलबदन बेगमि द्युत पॅरियन होकुम जि नोश लब कॅरिवुन हॉज़िर। पॅरियि द्रायि तु अनिख नोश लब। नोश लब वुछिथ गँयि म्यॉन्य मॉज स्यठाह मसरूर। तमि तुज स्व क्वछि मंज तु चॉवुन पनुन दूद। रछाह गँछिथ ह्यँच़ गुलबदन बेगमि वापस नेरनुच सखर करुन्य।

तँमिस कुन माजि म्याने वोन ब इखलास
च़े तु असि वारु गव व्वन्य उलफताह खास
हके सोहबत मशी नु युथ च़े व्वन्य ज़ाह
करुन्य गछि मेहरबॉनी गाह व बे गाह

गुलबदन बेगमि द्युतुनस वादु जि बु आसु प्रथ र्यतु योर यिवान। तनु वोत तस नोश लब ह्यथ सोन गरु यिवान तु तति रातस रोज़ान। तथ रातस छे सानि गरि शॉद्य आसान तु दूनुवय छि अख अँकिस लोल बरान।



जिनु सुंद युन तु अजब मलिकुनि अथु मारु गछुन



मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

नोश लबि हुंज़ कथ बोज़ुनॉविथ कोर नाज़ मस्ति अजब मलिकस इसरार ज़ि सु च़लिन
पनुन जुव बचॉविथ, युथ नु जिन तस मॉरिथ छुनि।

ब जल्दी तुल कदम व्वथ तोर कुन पख
समख तति माजि म्याने याम वातख
मे वोनूमय नेब व्वथ गछ दोर ह्यथ लार
यकीन बे शक मे छुम डेशख च़ु दिलदार

अजब मलिक गव नु कुनुय ज़ोन नेरनस तयार। सु ओस यछान नाज़ मस्ति ति पानस
सुत्प न्युन। नाज़ मस्ति मोनुस नु। तमि दोपुसः

चे सुत्यन म्योन येति नेरुन छु मुश्किल
पत् करि लार असि देवे सियाह दिल
गछव य्वद क्रूह सासस दूर नीरिथ
तती प्यठ बाज़ गश्त अनि यूर्य फीरिथ

नाज़ मस्ति कोर अजब मलिकस स्यठाह ज़ोर ज़ि सु च़लिन पनुन जुव बचॉविथ मगर
अजब मलिक गव नु तैयार। तँम्य कोर नाज़ मस्ति सुत्प वादु ज़ि सु मारि जिनस तु यिथु
पॉठ्य दिवुनावि तस आज़ॉदी। जिन मारुन ओस नु आसान मगर अजब मलिक ओस नु यि
माननु खॉतरु तैयार। तस ओस यकीन ज़ि जिन मरि तसंघव अथव। बस, सिर्फ गछयस
बख्त साथ द्युन।

नाज़ मस्त गँयि मजबूर। स्व लँज अजब मलिकुनि कामयॉबी खॉतरु दुआ करनि। पनुनिस
मुकर्र वख्तस प्यठ प्यव जिन वॉतिथ। सॉरिसुय गव ज़न बुन्युल।

व्वपर शख्साह वुछुन अंदर इमारत
क्रखाह बँड लॉयिनस कुस छुख बु मारथ

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

अजब मलिकस येलि जिनस प्यठ नज़र पेयि, तस गव दहशथ। तँम्य पुशुरोव पनुन पान दयस। अँदुर्य किन्य ह्योतुन ख्वदायि सुंद नाव, तु पनुनिस जुवस पोरुन फातेह। तमि पतु द्राव सु बे वाय पॉठ्य जिनस सुत्य दब करनि। अजब मलिकन तुज अख कमान अथस मंज़ तु कश कँडिथ लोयुन जिनस तीर। जिन आव तीर लँगिथुय पथर लायिनु। जँमीनस गव अलु अलु। जिनु सुंदि बदन मंज़ु गव खून जॉरी। अजब मलिकन तुज शमशेर अथस क्यथ तु अकी टासु कोरुन जिनु सुंद कलु अलग। तमि पतु त्रोव शाहज़ादन तसुंदिस बदनस रेज़ु रेज़ु कँरिथ। जिनु सुंदि मरनु गँयि नाज़ मस्त ख्वश।

गलान ऑसस बु यथ जिंदानसुय मंज़
दज़ान युथ ज़न हतब छे दानसुय मंज़
खँचुम अज़ चॉन्य बँड मिनथ तु लादन
लगय क्वरबान वंदय सर ज़े पादन



अजब मलिक तु नाज़ मस्त छि बहरीन कुन नेरान



नाज़ मस्ति कोर अजब मलिकस सुत्य वादु जि बु वातुनावथ च़ु नोश लबि निश। दूशवय सपुद्य मुल्के बहरीन कुन रवानु। सफर ओस स्यठाह कूठ। तिम रूद्य दूहस रातस पकान यीतिस कालस बहरीनु किस सरहदस प्यठ वॉत्य। दूशवय ऑस्य पँक्य पँक्य वँसिथ पेमुत्य। ब्रॉठ कुन पकनस ऑसुख नु कांह सूरथ। ऑखुरस ओन तिमव अख कौंसिद छाँडिथ। तस द्युतुख यनाम् तु दोपुहँस त्युहुंद खत बहरीनु किस पादशाहस निशि वातुनावुन। कौंसिद गव रॉज़ी। नाज़ मस्ति ल्यूख खत, यथ मंज़ तँम्य तिम तमाम वाकात लीख्य यिम तस सुत्य पेश ऑस्य आमृत्य। तमि पतु ल्यूख तमि अजब मलिकुनि तस निश वातुनुक हाल तु तसुंद जिनस मॉरिथ तस आज़ाद करनुच दँलील।

बु ऑसस कौंद दर जिंदाने हिजरान
गँयस आज़ाद मुश्किल गोम आसान
ब कहरे हक सपुन अफरीत बरबाद

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

बु वॅरनस रहमतु सुत्यन शादो आज़ाद

नाज़ मस्त ऑस गरु गछनु बापत तरसान। तस ओस मॉल्य सुंद स्यठाह लोल आमुत।
अख अख गॅर कडुन्य ओस तस कूठ बासान।

*मे वाराह आमतुय छुम लोल चोनुय, सॅनिथ गोमुत दिलस छुम लोल चोनुय
ब खॅदमथ वातु कर चलिहेम दिलुक शर, निसारे पाये शाह करु हा पनुन सर
वलेकिन वातु कर छुम दूर मॉज़िल, तवय छुम इज़तराबे गोमतुय दिल
खुशी छम खाब गॉमन्न ताब छुम नु, अॅछव किन्य खून जॉरी आब छुम नु
सरापा हाल पनुनुय कोर मे इज़हार, सलामत आस ऐ शाहे जहान दार*

कॉसिद द्राव खत ह्यथ तु वोत पादशाहस निशि।



पादशाह छु खत परान तु जवाब सोज़ान



पादशाहन येलि नाज़ मस्ति हुंद खत वुछ, तस आव अॅछन गाश। सथ गॅयस जि कूर छम
सॅही सलामथ। खत लोगुन पनुन्यन चेश्मन तु ह्योतुन परुन। खत पॅरिथ कोरुन कॉसिदस
शाबाश तु दोपुनस म्योन जवाब वातुनाव तस वापस। पादशाहन ल्यूख वदान वदान खतस
जवाब।

*फिराक चानि ओसुम सूर गोमुत
जमीन तंग आसमान यॅन्न दूर गोमुत
वनय क्याह चानि खॉतिर गोम कुस दाह
कराराह वारु पॉठ्यन आम नु ज़ांह
वॅरुम मे यावरी बख्तन ज़ोलुम गम
वलय, कल सातु सातु तूर्य कुन छम*

मकबूल शाह क्रालुवार्य संज मसनवी दास्तान-ए-गुलरेज़ - नवि सरु लेखन वोल : म.क.रैना

पादशाहन कोर कॅसिदस खत हवालु। सुत्प्य द्युतुनस म्वख्तु ज़ाँपानु, दायि तु ग्वलाम।
कॉसिद सपुद रवानु तु वोत नाज़ मस्ति निशि। तस वोनुन मॉल्य सुंद हाल तु बेयि द्युतुनस
तसुंद खत। खत पॅरिथ सपदेयि नाज़ मस्त शाद तु द्रायि अजब मलिक ह्यथ बहरीन कुन।

पादशाहन येलि कूर वुछ, तस चोल सोरुय गम। नाज़ मस्ति ति आयि नु पछ ज़ि स्व वॉच्चा
पॅज्य पॉठ्य गरु पनुन वापस। सॉरिसुय शहरस मंज़ आयि शॉद्य मनावनु। मिसकीनन तु
मोहताजन मंज़ आव खॉरात बॉगरावनु। अमि पतु वॅन्य नाज़ मस्ति अजब मलिकुन्य
दॅलील अकि लटि बेयि मॉलिस तु कॅरिन तसुंदि बहोदरी हुंद स्यठाह तॉरीफ। पादशाह
सपुद सख मुताँसिर। तस ओस नु यकीनुय ज़ि अजब मलिकस ह्यु कम वॉसि हुंद इनसान
हेकि तस जिनस मॉरिथ यस लछु बॅद्य रोस्तुम पूशिथ ह्यक हन नु।

नाज़ मस्ति कोर पनुन मोल अजब मलिकुनि मकसदु निश आगाह, ज़ि सु छु असली तल
गरि द्रामुत नोश लब छांडनु बापथ। पादशाहन वोनुसः

दोपुस तॅम्य तस करुन्य लॉज़िम छे यॉरी
छे तुजमुच्च चानि पुछि तॅम्य यीच्च खॉरी
यियी येलि नोश लब रौदाद वॅनिज्यस
त्युथुय वॅनिज्यस अँमिस प्यठ आर अँनिज्यस

❁ अजब मलिकस छु रासख समखान ❁

अजब मलिकस सुत्प्य मुलाकात कॅरिथ सपुद पादशाह स्यठाह ख्वश। तॅम्य द्युत तस शुमारु
खोतु ति ज़्यादु यनामु तु पानस निशि थॅवनस बेहनस जाय। तस गॅयि अजब मलिकुन्य
सख माय। अकि दूह द्राव शाहज़ादु शहरस कुन सॉलस। शामस बॉग्य येलि सु वापस
फेरान ओस, तस पेयि अँकिस परेशान हाल शख्सस प्यठ नज़र। यि ओस तसुंद रॅफीक
रासख। रासखन पछोन नु शाहज़ादु कॅह तिक्क्याज़ि तस ओस व्वन्य बुथिस रंगुय
बदल्योमुत। शाहज़ादन द्युत ग्वलामन होकुन ज़ि रासख वातुनॉविवुन महलस अंदर।

मकबूल शाह क्रालुवार्य संज मसनवी दास्तान-ए-गुलरेज - नवि सर लेखन वोल : म.क.रैना

शाहज़ादन प्रुछुस च़ कुस छुख तु कति आख। रासुखन वॅनिस पनुन्य सौरुय दॅलील।
ऑखुरस वोनुनस जि येलि सॉन्य नाव फॅट, बू लोगुस अॅकिस पचि खंजि प्यठ तु यीरान
यीरान वोटुस यथ शहरस मंज। मे छनु पनुनिस रॅफीक अजब मलिकस मुतलिक किहिन्य
खबर जि सु छा जिंद किनु समंदर बुज्य गव।

छवखा दिथ कोत च़ोलुम स्वख रावरॉविथ
नखु त्रॉविथ द्रखाह बोड गोम थॉविथ
लबन कति सर करस क्वरबान पायन
हट्युक रथ वंदहॅस लगहस बलायन

रासुखस गव अॅछन ओश जॉरी। अजब मलिकस गव नु यि बरदाश। तॅम्य दोपुस:

वफादारो मु वद बू यार छुस चोन
छुसय सुय आदनुक आरामे जान प्रोन

यि बूजिथ गव रासुखस दिल शादमान। अमि पतु बोव अजब मलिकन तस पनुन हाल।
रासुख गव यि बूजिथ ख्वश जि अजब मलिकन छु नोश लबि हुंद पय लोबमुत।



अजब मलिक छु नाज़ मस्ति ज़ार करान



अजब मलिक ओस नोश लबि हुंद दीदार करनु खॉतरु बेताब। सु लोग नाज़ मस्ति आह व
जॉरी करनि। तसंज बे तॉबी वुछिथ वोन तस नाज़ मस्ति जि पगाह छि नोश लब पनुनि
माजि सुत्य तोर वातन वाजेन्य। तमि कोर अॅकिस पोशु बागस मंज नोश लबि तु अजब
मलिकुनि समखनुक संज। तमि वोन शाहज़ादस:

च़ कड तामथ क्वठ्यन दर बाग वाशा
बू अननय नोश लब बहरे तमाशा

मकबूल शाह क्रालवार्य संज मसनवी दास्तान-ए-गुलरेज़ - नवि सर लेखन वोल : म.क.रैना

अगॉफिल पॉठ्य च़े निशि वातुनावन
ब जुज़ दॅरियाफ्त च़े नज़दीक थावन



नोश लब छे नाज़ मस्ति निशि यिवान



नोश लब वॉच़ पनुनि माजि गुलबदन बेगमि सुत्य पादशाह सिपाह सालारु सुंद गरु। तस ऑस नु खबर जि नाज़ मस्त छि जिनु सुंदि काँदु निशि आज़ाद गॉमुच़। तस येलि नाज़ मस्ति प्यठ नज़र पेयि, स्व गॅयि स्यठाह ख्वश। तस युस नार दिलस मंज़ नाज़ मस्ति हुँदि दूरिर् किन्य ओस, सु गव छ्यतु।

मे ओसुम लोल आमृत वारयाह चोन
च़ डीशिथ काच़ु ज़ूने ज़न च़ोलुम ग्रोन
यिनु च़ानिच़ खबर ऑसुम नु अज़ ताम
नतु च़े रोस कव यियिहे मे आराम

नाज़ मस्ति बोज़ुनॉव स्व पनुन्य दॅलील। जिनु सुंद जुलुम, अजब मलिकुन तस निशि युन, तसुंज़ बहोदरी हुंद कारनामु तु ऑखुरस जिनु सुंद मारु गछुन, यिमु कथु वनि नाज़ मस्ति तस वारु व्यछुनॉविथ।

ख्वदा गम काँसिनस ऑसिन फवलुवुन
सु छ्वख बॅलरॉविनस युस छुस ललुवुन

नोश लब गॅयि शाहज़ादु सुंघ तॉरीफ बूज़िथ मसहूर। यि वुछिथ वोन नाज़ मस्ति तस अजब मलिकुनि अँश्कुच दास्तान तु तसुंदि योर यिनुक मकसद।

वॅडिथ ऑसुस निमुच़ कल चॉन्य अँश्कन
तमी कजि गॅजमुच़य तस ऑस हन हन

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना
मगर नोश लबि आयि नु वेसि हुंज़ कथ पसंद। तस ओस नु गुमानुय जि नाज़ मस्त करि
तस सुत्य् यिछ कथ।

चखि हँच योर दोपुनस छा यि शायान
चे तु मे व्यसु तोन व्वन्य वोत पायान
न ज्ञानन कांह न ज्ञान्यम कांह मे अज़ ताम
चु कवु यँच छख करान नाहक मे बदनाम
कथव चान्यव कँरुस गमगीन व दिलु तंग
फुटुरथम शीश लोयुथ ऑयीनस संग
रवा छा यी अपुज़ तोहमथ मे अँनिथम
ज़हर बँड श्राख ज़न वॉलिंजि छुनिथम

हकीकत बूज़िथ छे नोश लब नरमान

नाज़ मस्ति ऑस नु खबर जि नोश लब गछि यि कथ बूज़िथ नाराज़। अमी पेयि तस स्व
दँलील वनुन्य योसु बुडन अजब मलिकस वँनिमुच ऑस तु यथ प्यठ शाहज़ादु ताज तख्त
त्रॉविथ नोश लबि छांडनि द्रामुत ओस।

बुडस निशि बूज़िमुत्य ऑसिन सिफत चॉन्य
तवय गारान द्रामुत ओस वथ चॉन्य
कोहिस्तानन तु वॉरान खारनुय मंज़
बियाबानन तु जंगल ज़ारनुय मंज़

यि बूज़िथ नरमेयि नोश लब। तस गव दिलस शोख सु जवान वुछनुक। तमि वँर नाज़
मस्ति गुज़ॉरिश जि मे करुनाव तु तस शाहज़ादु सुंद दीदार।

मकबूल शाह क्रालवार्य संज मसनवी दास्तान-ए-गुलरेज - नवि सरु लेखन वोल : म.क.रैना

गनेयम राय तैम्य संज गोम तौसीर
गैयस बूजिथ तसुंद अहवाल दिलगीर



नोश लब छे पोशि बागस मंज अचान



नाज मस्ति निये नोश लब तथ बागस मंज येति अजब मलिक बिहिथ ओस। बाग वुछिथुय तंबुल्यव नोश लबि हुंद दिल। रंगुरंगु आँस्य गुल फॅलिमुत्य। वावु सुत्य आँस पोशन ग्राय लगान तु ज़न आँस अँतुर फेरान। ग्वलाब, ही तु मसवल, बुनपशु, कारिपैत्य तु अँशकु पेचान, यँबुरज़ल, सदबर्ग, झाफर, नवरंग, अछि पोश, गर्ज प्रथ कांह पोशि ज़ौच आँस अथ चमनस अंदर। रंगु रंगु जानावार आँस्य मोदरि बोलि करान। कुस्मु कुस्मुक्क्य म्यवु आँस्य कुल्यन अलूंद। कुल्यन हुंजव ग्रायव, जानावारन हुंदि च्युरगिशि तु पोशि ज़ारव मँज्य वाव पकनु सुत्य योसु दिलस लूबुन्य आवाज़ गछान आँस, तिछ आवाज़ आँस न सेतारन, न साज़न तु न चंगन। गुलिस्तानस वुछिथुय आँस्य होश डलान तु जनतुक ब्रम गछान।



पोशि बागस मंज मुलाकात



अँथ्य लालु ज़ारस मंज सपुद नोश लबि अजब मलिकस सुत्य मुलाकात। बागस मंज येति नोश लबि शाहज़ादस प्यठ नज़र पेयि, तस लोग ज़न तु लोलुक तीर दिलस। शाहज़ाद सुंद रोय ओस ज़न तु इनसानस वटुस्य करुन लायक। नोश लबि ओस नु अथ दमस ताम युथ हू खूबसूरथ जवान वुछमुत। शाहज़ाद सुंद मस, अँछ, बुमु, वुठ गर्ज प्रथ कांह तान ओस मौर्य मौंद। नोश लब रुज़ुय नु योरुकिस आलमस सुत्य।

मकबूल शाह क्रालवार्य संज मसनवी दास्तान-ए-गुलरेज़ - नवि सर लेखन वोल : म.क.रैना

अँमिस रोस्तुय छु मुश्किल व्वन्य लसुन म्योन
न्यबर अज़ बाग नेरुन जुव खसुन म्योन
वँथिथ तमि जायि थोद हरगिज़ हेचिस नु
ज़ि नंगो शर्मि ख्वद तस कुन पँचिस नु

यीतिस कालस गँयि नाज़ मस्त अजब मलिकस निश तु वँनिनस नोश लबि हुंज़ बागस
मंज़ वातनुच कथ। शाहज़ादन युथुय नोश लबि हुंदि यिनुच कथ बूज़, सु गव देवानु। तँम्य
द्युत गज़ल ख्वानन होकुम तु साज़ो नगमुच महफिल आयि सजावनु।

कत्यू छांडथ मत्यो दरशुन दिहम ना
मत्योमुत दादि चाने छुस यिहम ना
कत्यू छांडथ वलो दिलदार म्याने
गोलुस चाने गमय गमखार म्याने

ऑखुरस करनॉव नाज़ मस्ति अजब मँलिकस तु नोश लबि बागस मंज़ मुलाकात। नोश
लब वुछिथुय गव शाहज़ादु बेहोश। येलि तस होश आव, तस आव नु यकीनुय ज़ि यि छु
पज़र। नोश लब ऑस पँज़्य पॉठ्य हूर। तसंज़ हालत ति ऑस तिछुय यिछ शाहज़ादु संज़
ऑस। दूशुवय ऑस्य अख अकिस प्यठ दिल हॉरिथ। तिमन बास्यव ज़ि अख अँकिस
वरॉय छि तिम ना मुकमल। अजब मलिकन वोनुस पनुनि दिलुक हाल:

द्यु क्याह ज़ानख च़े प्यठ मेहनथ तुजिम कुच
च़े छांडान दर जहान मज़रत तुजिम कुच
तुलिम कम कम सितम अज़ दोरे आफाक
बु फ्यूरुस आलमस गाह जुफ्त गाह ताक
च़े होवथम रोय वँरथम मेहरबॉनी
दिव्रुथ ज़न म्वरद जिस्मस ज़िंदगॉनी
छुसय बु त्रेशि होत प्यठ नागु रादस

मकबूल शाह क्रालुवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

दितम अख शरबताह व्वन्य वात दादस
बरख ना माय म्यॉनी छुय सवाबाह
सपुनतम येल वनतम रुत जवाबाह

नोश लब ति ऑस बेकरार मगर यिमन कथन ओसुस नु कांह जवाबाह। स्व ऑस पॅरी
जॉच्च, तमि किन्य ओस नु तस तु अजब मलिकस म्युल। तमि द्युतुस जवाब:

चु छुख इनसान बु छस जिन्से पॅरी ज़ाद
मु थक छय अथ कलामस सुस्त बुनियाद
मे पथ य्वद रावुरावख उमर सॉरय
लबख नु उलफतुच बोयाह मे लॉरय
मुलुच कथ छय बु छस खोचान पामन
मे छुम ना ज़ांह गोमुत आलूद दामन

अजब मलिक ओस नु नोश लबि हुंज कथ मानुनस तयार। तॅम्य वॅनिस बेयि पनुन्य ज़ार:

त्रे छुय पॅज्य पॉठ्य दामन पाक थोवमुत
मे छुम दिल खस्तु सीनु चाक गोमुत
सरु कर दादि चाने कुस सितम गोम
गोलुस यिथु नार डीशिथ छुय गलान मोम
जवॉनी सॉर त्रे पथ रावुरावम
हकूमत सलतनत यकबार त्रॉवम

कमाने चानि द्युतुनम तीर सीनस
छ्वकलद छूठ दिवान छुस प्यठ जॅमीनस

मगर नोश लब ऑस मजबूर। तमि दोपुस:

मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना

बन्योमुत जांह छुना दर मुल्के आलम
पैरी जादन हिशर आमुत ब आदम
मे इनसानन हुंजुय छम ना मुलय पछ
म कर देवानुगी येति आख तोत गछ
म वव तथ जायि फल येति कॅह बोयी ना
गली तति ब्योल कॅह हॉसिल यियी ना

शाहज़ादु ओस जुवस गिंदिथ अथ जायि ताम वोतमुत। सु ओस नु कुनि सूरतस मंज़ पथ ह्यनस तयार। तॅम्य लॉज आहो ज़ॉरी सुत्यु सुत्यु व्वन्य नोश लबि ख्वशामद करुन्य। तसुंघ व्यदाख बूज़िथ गॅयि नोश लब स्यठाह तंग। तमि य्वसु कॅन्य पनुनिस दिलस ऑस प्यठु थॅवमुन्न, स्व चॅज नीरिथ। तस आव पानस ति शाहज़ादु सुंद स्यठाह लोल बरनु। मगर पैरी ज़ाथ आसनु किन्य दिन्न तमि शाहज़ादस च्नेनुवॅन्य। दोपुनस अख वादु छुय करुन। चोन अॅशक गछि साफ तु पाक आसुन। अथ मंज़ गछी नु कुनि कुस्मुच नापाॅकी यिन्य। शाहज़ादन कोर यकरार।



मिलाप



द्वशवय लॅग्य अख अॅकिस तिथु पाॅठ्य लोल बरनि, ज़न तु तिम वुमरन हुंघ पानुवॅन्य जुदा ऑस्य गॉमुत्य। अमि पतु लॅग्य अख अॅकिस शकायथ करनि तु अख अॅकिस सुत्यु वफादॉरी हुंद वादु करनि। प्रोन गम मोटुख सोरुय।

तिथय गॅय शाद गम मोट प्रोन बिलकुल
खुशी यिछ बुलबुलस डीशिथ गछान गुल

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

अमि पतु लॅग्य दूशवय मस चेनि तु अख अँकिस जाम पिलुनावुनि। यि सिलसिलु रूद तीतिस कालस चलान यीतिस कालस दूशवुन्य होश रोव तु अख अँकिस नालुमति रँटिथ पेयख नैदुर।

🌀 गुलबदन छि कोरि छांडनि नेरान 🌀

हुपौर्य ऑस नोश लबि हुंज मॉज गुलबदन तु नाज़ मस्ति हुंज मॉज कोर्यन हुंदि खॉतरु परेशान। सूंचुख, कोरि द्रायि गरि सॉलाह करनु खॉतरु बागस कुन, मगर यूत चेर क्याज़ि गोख ? गुलबदन ऑस सोंचान जि कोरि छि वारियाहि कॉल्य पानुवॅन्य समखेमचु। नाज़ मस्ति हुंज बेनि मस्त नाज़ ति छख सुत्य गॉमुन्न, अमी आसन पानुवॅन्य दरबाराह करनि लॅग्यमुत्य। बेयि कैह वख्तस प्रॉरिथ ति येलि नु कोरि वापस आयि, नोश लबि हुंजि माजि लॅज फिकिर। स्व द्रायि तिमन छांडुनि। वातान वातान वॉन्न स्व तथ बागस मंज येति नोश लब शाहज़ादस सुत्य ऑस। येलि तमि पनुन्य कूर तु अजब मॅलिक अख अँकिस लरि शॉगिथ वुछ, तस गव अँछन अनिगोट। कूद सुत्य गोस अँछव मंजु नार जॉहिर। तस आयि नु पछुय जि तसुंज कूर करि युथ अतुर तु खानुदानस करि रुसवॉयी।

खजालेंत्र टोंग टवख द्युतुथम नॅगीनस
फुटुम शीशु लॅजिम वॅन्य आबगीनस
अदावथ यिछ कमिच ऑसुय त्रे म्यॉनी
कॅरुथ रुसवाये आलम कूर म्यॉनी
सज़ा पानय लबख त्युथ युथ करख कार
ब्वी मा कॉल्य गुल य्वद अज़ ववख खार

त्रे छुय ना कैह खता राह छुम मे पानस
मे पानय प्रान मिलुनोव ज़ाफ़रानस

मकबूल शाह क्रालवार्य संज मसनवी दास्तान-ए-गुलरेज़ - नवि सर लेखन वोल : म.क.रैना

खबर छन क्याह त्रे ऑसुय कीनु खॉही
तवय पुछि रोब अँनिथम रू सियाँही

🌸 नोश लब तु शाहज़ादु संज जुदाँयी 🌸

नोश लब ऑस शॉगिथ मगर पॅरी ज़ाथ आसनु किन्य ऑस स्व माजि हुंद बुथ ति वुछान तु तसंज कथ ति बोज़ान। नैदरि मंज़ुय चायि तस मॉज ब्रोंठु कनि वुछिथ थरु थरु। तमि ह्योत बख़्शानु खॉतरु माजि ज़ारु पारु करुन। येलि नु माजि हुंद ग्वसु कुनि सूरतस मंज़ कम गव, नोश लबि वॅन्य तस शाहज़ादु सुद सॉरुय दलील जि सु कुस छु तु कति प्यठ छु तसंदि खॉतरु आमुत।

स्व गॅयि शरमंद सौरुय हाल वोनूनस
तसुंद अहवाल व माहो साल वोनूनस
हकीकथ वाकई वॅनिनस मुफस्सल
खॅटिथ थोवुनस नु कांह हरफा न अमल
यि शाहज़ादय छु तुरकिसतानु आमुत
छु अँशकन ओनुमुतुय छुनु पानु आमुत
स्व बुडु संज कीफियत तॅम्य बाँवुनस सॉर
मुच्चरनस सर ब सर सिरु किस गरस दॉर

मगर तसुंदघव व्यदाखव सुत्य गव नु गुलबदन बेगमि कांह असर। तमि द्युत पॅरियन होकुम जि नोश लब वॅरिवुन नवजवानस निशि जुदा।

जुदा वॅल्य वॅल्य कॅर्यूख यिम अख अँकिस निश
यि कथ गछि युथ नु नॅन्य काँसि अँकिस निश
तिथुय तुलिज़्योख गछन यिम युथ नु बेदार

मकबूल शाह क्रालुवार्य संज मसनवी दास्तान-ए-गुलरेज - नवि सर लेखन वोल : म.क.रैना

खबरदार युथ नु यिम सपनन खबरदार
ब खानै नोश लब गछि वातुनावन्य
कुठिस पनुनिस अंदर ल्वति पॉठ्य सावन्य
हुमिस गछि गाश तुरकिस्तान हावुन
वुकरमनु सख्त दर वॉरानु त्रावुन

पेरियव तुल शाहजाद तु त्रुवुख तुरकिस्तानु गॅछिथ। नोश लब तुजिख नैदरि हॅच्चुय तु त्रॉवुख पनुनिस कुठिस मंज। न रुज तस शाहजाद संज खबर तु न रुज शाहजादस तसंज।

🌀 नोश लब छि बेदार गछान तु व्यदाख दिवान 🌀

नोश लब येलि बेदार गॅयि, तमि दिच ओरु योर नजर। पनुन पान वुछुन पनुनिस गरस मंज तु शाहजाद ओस नु कुनिय। तस पेयि स्व विज याद येलि तसंज मॉज रात क्युत बागस मंज आयि तु स्व वुछिन शाहजादस सृत्य नॉली नाल। शाहजाद संज जुदॉयी गॅयि नु नोश लबि बरदाश। तमि ह्योत पनुन यार छारुन तु व्यदाख दिन्प।

🌀 व्यदाख 🌀

सुबुह फोल बुलबुलव तुल शोर-गे-गौगा, गॅयस बेदार, मुचरेम चेशमे शहला
खबर ऑसम बु छस दरबर निगारस, मुकरर गोब छि पेन्य नैदर बहारस

नजर त्रॉवुम न ड्यूतुम बाग नै गुल, न बूजुम अज चमन आवाजि बुलबुल
न ड्यूतुम यार नै गुलजार नै बाग, न रातुक ऑश इला बर जिगर दाग

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

गट मीजिम, सुबुह सपनुम गमुक शाम, मुसीबत प्योम अश्क अज़ गम करिम दाम
हेतिम वॅन्य दिन्य निगारस गुलाज़ारस, पसो पेशस यमीनस तय पसारस

वुछुम नु रोये ज़ेबा यार सुंदुय, निशाना कांह ति तस दिलदार सुंदुय
बजाये गुल ब-सीनु खार ड्यूदुम, ह्योतुम छांडुन खज़ानु मार ड्यूदुम

दपान ऑसस दिलस बा चेशमे पुर आब, स्व मँजलिस रातची मा आसिहे खाब
सु ऑशा राहता दशवुन्य ब्रेमा ओस, खुशी शूब्यस वनुन्य कर मातमा ओस

मदर ओनुनम तदर कोरुनम बदनस, वदान आलव हेतिम दिन्य तस मदनस
निगारा बे मदारा सरदि महारा, बुता, माहे मुनीरा, खूब चहरा

होंदर लॅगिथ नेंदर पॉविथ च़ोलूहम, फिराका ललुवुन त्रॉविथ च़ोलूहम
मतो चलतम मत्यो मँचरॉवथस बो, यितो बेयि सथ गछ्यम मँशरॉवथस बो

परन पादन प्यमय थॅवथम मे लादन, दितम सर आलवय आलव च़ु नादन
वदुन त्रॉविथ च़लुन च़ूरे रवा छा, थवुन युथ दाग मस्तूरे रवा छा

दुर फलि म्यानि कथ गोशस रॅटुथ जाय, च़े गोशन म्योन गोय ना त्रॉवथम माय
खॅरीदारो कम्मू बाज़ारु छारथ, मे तावन पोवथम कमि वानु गारथ

हरेयस आरुवल गोलाबु बोयो, दॅज़स महताब ज़न महताब रोयो
पॅरी देवानु कॅरथस माह जबीनु, यिहम ना बहर लिल्लाह मह जबीनु

कमां ज़न गोम कद बद वलजमाले, सेद्योमुत तीर अँशुकुन हियु माले
ज़ूलेखा यूसफो च़े पथ अनेयस, मतेयस वामिको अज़रा बनेयस

ब-तल्खी छस दिवान शीरीन फॅरियाद, गछ्यम ना पॉदु ख्वश दीदार फरहाद
कोतू च़ोलुहॅम मत्यो मजनूनु म्याने, मे थोवथम दोद ललुवुन लॉलि जाने

मकबूल शाह क्रालवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

थफा दिथ नकदि दिल ह्यथ दूर गोहम, जफा कारो शिलस सॅन्य चूर प्योहम
मदन वारो बदन गोहम मे जॉलिथ, ह्यकय नो दूरिरुक आतश बो चॉलिथ

मलालु गोय कमुक, कव पुचि मे रूदुक, वॅमिस ताले वरस इकबाल ब्यूदुक
चरागे खुरमी छेवरिथ गमुक वाव, अनि गोट गोम माह र्वखसारु म्वख हाव

फरोगे नूरे माह र्वख चूरि हावुम, बिहिशतियो जमाला हूरि हावुम
पतु यिमहय अमा वथ छम नु मोलूम, नतु ज़रहा नु हिजरुक तीरि मसमूम

शेछा लदुहय अमा कांह छुम नु दर दिल, त्रे थोवथम लालु रोयो दाग बर दिल
कुसू सोज़य, कुसू बावी यि तकरीर, पक्यम कुस तोत सिवाये बादि शबगीर

यितो हा सुबुह के ख्वशबोयि वावो, नितो तस गुलाज़ारस म्यानि ग्रावो
जि गरदि राह च़ु दामन दुन्य़जि अवल, पस अंगु नॅट्य नॅट्य गॅछिज्यस बरस तल

अदब रॅछिथय सदा कॅर्य़ज्यस ब हलकु, खबर आहस्तु वॅन्य़ज्यस मोदरि हलकु
जफा अंदेशि कस त्राँविथ स्व मज़लूम, कोरुथ क्याह थामि लॉजिथ पामु माँसूम

मुहिथ गव ह्यन वॅनिथ छनु काँसि ज़ानान, वुहिथ गॅयि चानि पचि ऐ जाने जानान
पर्युन सीनस सपुद तस चानि होलु, च़ु डोलहस लोलु रस्त्यो अहदो कौलु

मे वॅर्य़थम होलु सुत्यू परकालु पानस, कवो च़ुय लालु फोरहम बालु पानस
मुदा ऑसुय करन्य़ ऑखुर जुदॉयी, योहय छा साँ तॅरीके हक अदॉयी

शिकस्तु दिल वॅरिथ तनाज़ो मगरूर, समन अंदामु ब्यब बॅरथस बज़ंबूर
हतो वावो च़ु क्या ज़ानख मे क्या गव, गॅमत्य छिम वॉलिंजे दमगीरकी स्रव

बिहिथ कथ गुलशनस मंज़ गुल अंदाम, सही सरवुन सही अॅन्य़ज्यम मे पाँगाम
ह्यसु डॅजराँवुनस मस दिथ मसाँछिव्य़, बन्यम नै मल वुन्यम दामानु रिव्य़ रिव्य़

मकबूल शाह क्रालुवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

छेतु मशाल गॅयस यावुन व्यतु गोम, स्वतेयस वॅद्य वॅद्य शोरस ज्युतु प्योम
तनूरस अश्कनिस मंज छस हतब जन, वनस दॅदवन कोरुम तॅम्य सरवि सबजन

खजान चाम अन्नवुन्य सुय बहारस, सुली द्रह लूसिथय गव पोह हारस
हँदर जन गॅजस श्रावनु आफताबु, ब-ताबम चूं तपद माही ब-ताब

फवलुवुन्य सुय बहारस अँरनि रंग गोम, म्वललिस ऑशिकिस खँजरस श्रंग गोम
दु-हफ्तुचि जूनि सर तुलिथय ग्रुहुन प्योम, शोगूफस शीन गुलजारस कुहुन प्योम

हियि थॅर यावुन्य कॅरथम बरु मे, ज़र ज़र सीम तन ज़ॉजुथ ज़र मे
शमा सूरत बु छस गरयान व सोजान, चू परवान, सु बे परवानु बोजान

यँबरजल तस बँबूरनि मायि वॅजनस, फ़ेकुवुन्य चॅर प्रकुवुनि तावु तँजनस
फवलुवुन्य पोशि थॅर छँचरॉवनस बँ, असुवुन्य वॅद्य वॅदी व्यसरॉवनस बँ

सनोबर कामतन हँज वीर कॅरनस, स्वनस सरतल गॅयम, तशहीर कॅरनस
सरुक पम्पोश ऑसुस फोजमुन्नय हॉर्य, कॅरुस गरकाब गमे ख्वरशीद र्वखसॉर्य

दुपहरन शाम मे गोम खाम कारे, दुरस गोम फोतु रूदुम तोतु हारे
गॅजुस कॅज काम दीवनि आमनेयस, लोगुम दर लावि मूरे आवसेयस

कबाबुक्य पॉठ्य तँजनस गरुम तावे, अडु दँज वुन्य गॅयम सरमूरि लावे
चॅंठिथ कॅम्य शँत्रनुय लोगुम मित्र मे, लँदिथ तासस पेयम तोसस अँथुर मे

तिथिस जानानुसुय रोस्तुय लसा बो, सु त्रॉविथ गॉरनुय सुत्यन बसा बो
सु त्रॉविथ कर यियम नँदर तु नेह मे, सु त्रॉविथ शरबते शीरीन छु वेह मे

मकबूल शाह क्रालुवार्य संज मसनवी दास्तान-ए-गुलरेज़ - नवि सरु लेखन वोल : म.क.रैना

गुलिस्ताने बे र्वखि गुल र्वख छु जिंदान, सरीरुक न्वक्तु सँगीन तर जि सिंदान
सु त्राँविथ मंग क्या यथ पॉट्य प्रंगस, सु त्राँविथ माज़ कर बँ नक्शो रंगस

सु त्राँविथ कर गुलन प्यठ दिल लग्यम मे, चो बुलबुल बाग छावुन कर तग्यम मे
बिहिश्ते जाविदां दोज़ुख चू बे यार, ब-तन जंजीर ज़ेवर तख्त ज़न दार

बसर अफसर गमुक कर गॉरि दिलबर, ब-पहलू फरशि मखमल खार बसतर
सरासीमुह गँयस जामन द्युतुम चाख, मोलुम ऑयीनु खानस सूर तै खाख
व्यदाख ऑंसस दिवान हिजरुच करान ल्यल, व्वलो कँरथस बर ताज़ यँबरजल

🌸 गुलबदन बेगम छि नोश लबि जानवर बनावान 🌸

नोश लबि हुंज़ मॉज गँयि तसुंघ व्यदाख बूज़िथ जादय गज़बनाक । तमि वोन कोरि कुनः

कँमी शॉत्रन च़ अथ यिछि नावि वॉजिख
मित्र लॉगिथ कँमी तच्चि तावि ज़ॉजिख
हया बर ताक थॉवुथ शर्म त्राँवुथ
पँरी क्रॉनिस खजालथ वातुनॉवुथ
कँबीलस मंज़ च़े पानस दाग थोवुथ
ब दुनिया नाव सोनुय मंदछोवुथ
गँयख अज़ कारे बद बदगारो बदनाम
थँवुथ पानस पँरी क्रॉनिस अंदर पाम

अमि पतु कोर गुलबदन बेगमि ज़बरदस्त लानु तानु कोरि । नोश लबि ओस ओश जॉरी ।
मॉज गँयि नु कुनि सूरतस मंज़ तस मॉफी दिनस तयार । तमि पँर माँथुर तु द्युतुन कोरि
फवख । नोश लब बनेयि जानावार । माजि ज़ोन जि अमी सुत्यु रोज़ि तसुंज़ कथ खँटिथ ।

मकबूल शाह क्रालवार्य संज मसनवी दास्तान-ए-गुलरेज़ - नवि सरु लेखन वोल : म.क.रैना

तमि दूह प्यठु वोत नोश लबि जानावार बँनिथ दर दुनिया फेरान तु अजब मलिकस छांडान। दँहन वँरियन फीर स्व बियाबानन, जंगलन, पहाडन, समंदरन तु बँस्तियन, मगर कुनि जायि लोब नु तमि तसुंद कांह नेब।

🌸 माँसूम शाहस छु नोश लबि हुंज दलील बूज़िथ सख असर गछान 🌸

जानावार (युस असली नोश लब छि) म्वकल्यव दँलील बोज़ुनॉविथ। तँम्य वोन माँसूम शाहस जि अज़ वॉत्य मे दह वँरी येमी शक्लि। बु फीरुस चहारू तरफ मगर सु यार आम नु कुनि अथि। च़े कुन पेयम नज़र तु चॉनिस बुथिस मंज़ आम तसुंद अनहार ह्यू बोज़नु। लोल ह्यू च़ोलुम तु पनुन पान कोरुम ज़ोरु चॉनिस ज़ालस मंज़ गिरिफतार।

माँसूम शाह गव जानावारु सुंदिस राजस वॉकफ। तँम्य द्युत तस दिलासु:

दोपुन तस रोज़ ख्वश गम त्राव साँरी
करय बु अथ गमस मंज़ गम गसाँरी
मुसाँफिर लाँगिथुय हमराह ह्यमथ बँ
सु दिलबर चोन छांडन हर सिमत बँ

माँसूम शाहन कोर जानावरस सुत्य वादु जि सु वातुनावि तस अजब मलिकस निशि। मगर जानावारस ओस नु यकीन जि माँसूम शाह ह्यू माँसूम इनसान हेकि अजब मलिकस छाँडिथ। जानावारन वँन्य तस मिसालि पाँठ्यन अख दँलील।

मकबूल शाह क्रालुवार्य सुंज मसनवी दास्तान-ए-गुलरेज - नवि सरु लेखन वोल : म.क.रैना

👁️ हाजथ 👁️

दपान अख बुर्जगाह ओस। नाव ओसुस इब्राहीम। बाह वॅरी गॅयी, तसुंदिस नफुसस गॅयि अख दॉन खेनुच खॉहिश। दूहय रूद सु बुर्जगस दॉन मंगान, अख दॉन, चोक या मोदुर। मगर बुर्जगन वॅर नु ज़ांह तसुंज खॉहिश पूर। अकि दूह गव इब्राहीम अँकिस दरवेशस निशि। दरवेश ओस ब्यमार। सलामाह वॅरिथ प्रुछ इब्राहीमन तस ज़ि कांह तमन्ना मा छुय, बु करुहॅय सु पूर। दरवेशन दोपुस, 'मरहबा छुय अथ लियाकतस। पनुनि नफसुक हाजथ कडनुक छुय नु ताकत, तु लूकन छूख साल करान। युस नफर नु पनुन हाजथ पूर हेंकि वॅरिथ, सु क्याह करि बेयिस।'

यि दॅलील बोज़ुनॉविथ वोन जानावारन माँसूम शाहसः

दोपुन माँसूम शाहस कुन ब ताँजीम
मे हाजथ नेरि नु पानस त्रे छुय बीम
बनी नु यस कडुन हाजथ पनुन ज़ांह
मुरादे दिल वनुन तस हॉसली क्याह

माँसूम शाहस लॅज जानावारु सुंज कथ दिलस मगर ह्यमथ हॉरुन नु कैह। तॅम्य वोनस दरजवाब ज़ि त्रे छय असली तल पानस ईमानुच वॅमी। ख्वदा छु प्रथ अँक्य सुंज मुराद पूर करन वोल। प्रथ रॉन्न पतु छु गाश फवलान तु अनिगोट खत्म गछान। आँखुरस छु ती सपदान यि ख्वदा साँबस करुन छु आसान। अथ प्यठ ह्यँन्न माँसूम शाहन जानावारस अख दॅलील बोज़ुनावुन्य।

❁ हारून रँशीद तु शाहज़ादु ❁

दपान अख बादशाह ओस। नाव ओसुस हारून रँशीद। सु ओस स्यठाह अँमीर, सँखी तु रहमदिल। ख्वदायि संज इबादथ ति ओस स्यठाह करान। दपान अकि दह ओस सु अँकिस बागस मंज खलवत बिहिथ इबादथ करान जि तस ब्रोंठ कनि गव अख जानावार ज़ॉहिर। जानावार ओस स्यठाह खूबसुरथ। कलु ओसुस सब्ज रंगु तु पखु आसस व्वज़जि। हारून रँशीदस तंबुल्यव जानावारस वुछिथ दिल। युथुय जानावार हारून रँशीदस ब्रोंठ कुन आव, तँम्य दिच तस थफ तु रँटनस जंग। जानावार गव वुडिथ तु हारून रँशीद रूद तसंज जंग रँटिथुय अवेज़ान। जानावार खोत वारियाह थोद तु रूद वुडान। बादशाह गव दम फुट्य। जंग यलु त्रावनस ति ओसुस नु वार। अँछन गोस अनिगोट तु पनुनि जिंदगी हुंज व्वमेद त्रॉवन। ऑखुरस करि तँम्य पनुनि अँछ बंद।

हेचन नु चेश्म मुन्नरिथ त्यूत गव तंग
न ज़ोनन वार तस अथ त्रावनस जंग

छु सार्यन टोट ऑखुर जाने शीरीन
सु दुनियादार ऑसिन या सु मिसकीन

जानावार गव समंदरु पेठ्य वुडान तु ऑखुरस वोत सु अकिस जुविस मंज। बादशाहन येलि पानस तलु कनि जँमीन वुछ, तस च़ोल वसवास। जानावार वोथ जँमीनस प्यठ तु बादशाहन त्रॉव तस थफ यलु। पनुन पान सँही सलामथ वुछिथ कोर तँम्य मॉलिकस कुन शुकर। जानावार च़ोल वुडिथ वापस। बादशाहन सूच पानस सूती जि खबर कांह ग्वनाह मा आस्यम कोरमुत तु तमिकुय सज़ाह छुम अज़ मेलान। पनुनिस पानस द्युतुन तसलाह जि यि मॉलिकन ल्यूखमुत आस्यम ति वात्यम।

हारून रँशीद ओस वुनि सोंचानुय जि तस गँयि नाव पकनुच आवाज़ कनन। तँम्य दिच समंदरस कुन नज़र। अँकिस नावि मंज ऑस्य वारियाह नफर तु जुविस निशि वॉतिथुय वँथ्य तिम नावि मंजु ब्वन। तिमन मंज ओस अख शाहज़ादु तु बाकय तसुंद्य अँमीर तु वँज़ीर। वुछान वुछान आव शाहज़ादु सुंदि खॉतरु अख ऑलीशान सायेबानु लागनु।

मकबूल शाह क्रालवार्य संज मसनवी दास्तान-ए-गुलरेज - नवि सर लेखन वोल : म.क.रैना

पँथरिस आव मखमली फर्श करनु तु अख तख्त लागनु। शाहज़ादु ब्यूठ तख्तस प्यठ। बाकय सॉरी रूद्य इसतादु। अमि पतु ह्योत तिमव अँमीरव तु वँज़ीरव शाहज़ादस र्वख्सथ तु द्रायि नावि क्यथ वापस।

हारून रँशीद गव हॉरान जि शाहज़ादु क्याज़ि रूद यिथिस बियाबान जुविस मंज़ कुनुय ज़ोन? सु गव तस ब्रोंठकुन। सलामाह कँरिथ ओस वुनि बादशाहस कैह वनुनय जि शाहज़ादन प्रुछुस च़ कुस छुख तु यथ वॉरान जुविस प्यठ क्याह छुख कुनुय ज़ोन करान।

*कुनुय ज़ोन, सुत्य छुय ना कांह रफीका
न यारा दोस्ता नय कांह शँफीका*

बादशाहन वोनस नु पोज़ कैह। दोपुनस बु छुस अख सोदागर। बु ओसुस माल जादाद ह्यथ अँकिस जहाज़स मंज़ पकान जि वावु तूफान आव। म्योन जहाज़ गव माल असबाब तु म्यॉन्य नोकर ह्यथ समंदरस पँटिथ। बु बचोस बडु मुश्किलन तु वोतुस यथ जुविस प्यठ। च़ वुछिथ गोम दिल स्यठाह ख्वश, तमी आस च़े निशि लारान।

शाहज़ादु ति गव हारून रँशीदस वुछिथ ख्वश। दोपुनस, माल जादादुच मु बर फिकिर कैह। बु करय चोन सोरुय न्वखसान पूर। च़ थव पनुन दिल शाद।

हारून रँशीदन वोनस, बु ओसुस ग्वडय ज़ॉनिथ जि च़ गछ़ख शाहज़ादु आसुन। वन्य वनतम च़ क्याज़ि आख योर तु कुनुय ज़ोन क्याज़ि ब्यूठुख यथ वॉरान जाथस मंज़ ?

*सबब वनतम बिहिथ छुख क्याज़ि तन्हा
न हमदम सुत्य छुय, न हम सुखन हा
ब तन्हॉई व वहदत क्याह मुदा छुय
पनुन छुयि ज़ोक किनु शोके खुदा छुय*

शाहज़ादन वोनस, बु छुस फलां मुल्कुक शहनशाह। म्यॉन्य सलतनथ छि स्यठा बँड तु मे ताबेह छि वारियाह दाना तु ऑकुल। म्यॉन्य वँज़ीर छि स्यठाह मुदबिर तु मसलहत अंदेश।

मकबूल शाह क्रालुवार्य संज मसनवी दास्तान-ए-गुलरेज - नवि सर लेखन वोल : म.क.रैना

तिमन निशि छुनु कांह राज छुपिथ। तिमवुय वोन मे जि यि नोव र्यथ छु मे प्यठ गोब तु यथ र्यतस म्योन पनुनिस मुल्कस मंज रोजुन छुनु जान, तिक्याजि मे छु हारुन रॅशीदुनि तरफु इजाह वातन वोल। अगर बु पनुनिस मुल्कस मंज रोजु, सु छुनि मे मॉरिथ। म्यान्यव वॅजीरव कोर सलाह तु बु वातुनोव हस यथ जुविस मंज, योत नु सु हेकि वॉतिथ।

सॅमिथ तदबीर टॅहरॉवख वॅजीरव
तिमन म्योन्युय गरे नेरुन सलाह प्यव
सलाहे नेक वोनहम छुय त्रे बेहतर
सोकूनथ मंज जुविस माहस नॅविस कर

हारुन रॅशीदन बूज शाहजादु संजि जेवि पनुन नाव तु गव हॉरतस। तस ओस नु शाहजादस सुत्य कांह अदावथ तु सु मारनुक ओस नु सवालुय पॉदु गछान। तॅम्य सूंच जि शाहजादु संघव वॅजीरव छु तसुंद ताज तख्त ख्यनु खॉतरु यि चाल वॅरमुच। अमी छुख सु यूत दूर अॅनिथ यथ जुविस मंज त्रोवमुत। मगर तॅम्य वोन नु शाहजादस अथ मुतलिक कैह।

शाहजादु ओस ख्वश जि सु छु तथ जायि बिहिथ योत नु कांह हेकि वॉतिथ। तॅम्य कजि तिमु सारेय शॉही जियाफतु न्यबर, यिम तॅम्य अॅकिस र्यतस ख्यनु बापथ सुत्य आसु अनिमचु। अथ मंज ऑस्य कबाबु, नान, बिरयॉन्य, क्वकर बेत्री प्रथ कांह चीज मूजूद। शाहजादन कोर हारुन रॅशीदस साल। दोपुनस च्नु आसख खबर कृति कालुक फाकय। पख ब्रॉठ कुन तु वुछ मजु यिमन शॉही जियाफतन हुंद।

अमि पतु ह्योत शाहजादन माज रानि मंजु श्राकपुचि सुत्य अख अख टुकरु च्नुतुन तु हारुन रॅशीदस पानय आपरावुन।

कलम त्राशा कोडुन नोजुक स्यटाह तेज
वुरिथ तथ माज आपुरनस वॅरिथ तेज

मकबूल शाह क्रालुवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

शराबुक दौर सपुद शुरू। हारून रँशीद गव ज़ियाफतु ख्यथ शाहज़ादु सुंद स्यठाह ममनून। दोपुनस, 'चॉन्य मेहमान नवॉज़ी वुछिथ सपदुस बु स्यठाह ख्वश। व्वन्य छु म्योन ति फज़्ज जि बु करु चॉन्य कैह खँदमथ।'

सपुन हारून रँशीद ममनूने एहसान
दोपुन शाहज़ादस ऐ यारे वफादार
चे मेहमान दॉरिया वँरथम ब खूबी
मावज़ खँदमथाह चे ति म्यॉन्य शूबी

हारून रँशीदन वोन शाहज़ादस जि यिथु पॉठ्य चे आपुरॉविथ मे लोलु सान माज़ पँकल्य, तिथय पॉठ्य आपरय बु ति वापस। शाहज़ादन द्युतुस इजाज़थ। हारून रँशीदन तुल श्रापुकुच नोखस प्यठ अख अस्ल ह्यू माज़ फोल तु आपरोवुन शाहज़ादस। क्वदरतु सुंद करुन सपुद युथ जि अमी सातु पेयि शाहज़ादस प्वंद। श्राख चायि तसुंदिस तालस तु सु प्यव खून हारान पथर तु मूद।

कज़ा ज़ांह फेरि नु हरगिज़ ब तकदीर
कज़ा लारान पतु गिरान छु तकदीर

हारून रँशीदस प्यव स्टाह दूख। सु गव ख्वदावँदी प्यठ हॉरान। पनुनिस पानस प्यठ गँयि तस शरमंदगी जि नाहक खोत तस शाहज़ादु सुंद खून कलस। तस आव व्वन्य समुज जि जानावारन क्याज़ि ओस सु अथ जुविस प्यठ वातुनोवमुत। अमी वख्तु प्यव सु जानावार बेयि ओर वॉतिथ। हारून रँशीदस च़ोल व्वन्य पनुनि जुवुक लरज़। तँम्य वँर जानावारस जंगि थफ। जानावार गव वुडिथ तु वातुनोवुन सु वापस पनुनिस बागस मंज़।

गुलिस्तान डीशिथय मसरुर गव शाह
ब हॉरथ ओस, कोत वोतुस वुछुम क्याह

❁ मोसूम शाह छु नोश लब ह्यथ नेरनुच सखर करान ❁

दास्तान खत्म वॅरिथ वोन मोसूम शाहन नोश लबि कुन ज़ि येमिस यि मुकदरस मंज़ आसि, तस ति वाति। हरगाह चॉनिस कुस्मतस मंज़ ति च्ने यारस निशि वातुन लीखिथ आसिय, तेलि वातुनावी बे शक ख्वदा तस निशि। यि वॅनिथ त्रोव मोसूम शाहन डाफ तु पेयस नैदुर।

सुबहस येलि संगर फोल्स, मोसूम शाह गव बेदार। सु वोत बेयि जानावारु सुंदिस पंजरस निशि तु पृष्ठुन तस ज़ि अज़ रातस वॅरुथा च्ने नैदरि ज्वलाह किनु किही नु? जानावारन द्युतुस जवाब:

दोपुस तमि यस बुछिथ ज़लि कालु शाहमार
तॅमिस आरामु सुय सुत्यन छु क्याह कार
दज़ान युस लोलु नारस मंज़ छु हर दम
तॅमिस क्युत छुय जहानुक ऑश मातम

जानावारु सुंदिस रुपस मंज़ ऑस नोश लब वदान तु रिवान। तस ओस सॅर्य पेठ्य सॅहलाब गोमुत। स्व ऑस अजब मलिकस समखनु खॉत्रु बे करार। मोसूम शाहस लॅज तसुंज़ हालत वुछिथ दिलस नवि सरु ग्राय। सु द्राव यकदम न्यबर कुन तु सफरुच तयॉरी करनुक द्युतुन होकुम।

येलि सिरिं लोसुनस तैयार ओस, मोसूम शाहन तुल जानावारु सुंद ठ्युप अथस क्यथ तु द्राव सफरस। ग्वलाम तु खॅदमथगार आयि सुत्य तुलनु।

मोसूम शाहन रॅट बैयतुल अमानुच वथ। सफर ओस स्यठाह कूठ। थख दिनु वरॉय रुद्य तिम रातस दूहस पकान। ग्वलामन रुज़ नु व्वन्य ब्रॉठ पकनस किन्न कांह सूरथ। अकि अकि ह्योत तिमय सारिवुय पथ फेरुन। मोसूम शाह रूद व्वन्य कुनुय ज़ोन। तॅम्य रोट ठ्युप पनुनिस कलस प्यठ तु रूद वारु वारु कदम दिवान। येलि दिलस मंज़ इरादु प्वख्तु आसि, क्वदरथ ति छु मदद करान। अमी प्वख्तु इरादु सुत्य वोत ऑखुरस मोसूम शाह ति

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

बैयतुल अमान। ठ्युप त्रोवुन पानस दूर अँकिस कुल्य लंजि तिथु पॉठ्य अलूंद जि काँसि
हुंज़ नज़र पेयस नु। अमि पतु द्युत तँम्य थख। बैयतुल अमानु क्यन जिनन यामथ तस
प्यठ नज़र पेयि, तिम आयि तस मारनु खॉतरु तु कोरहँस अँद्य अँद्य गेरु। अमि पतु पृछुहस
जि च़ कुस छुख तु यथ मुल्कस मंज़ क्या करनि आख।

मोसूम शाहन वोनुनख जि ब्रु छुस स्यठाह खॉरी तुलिथ यथ जायि वोतमुत। नोश लब छम
सुत्य तु म्योन मुदा छु तसंजि माजि समखुन। नोश लबि हुंद नाव बूज़िथ गँय तिम स्यठाह
ख्वश तु लारान लारान वातुनॉवुख यि शेछ नोश लबि हुंजि माजि ताम।

खबर येलि कोरि हुंजे माजि बूज़न
कँनीज़ाह शाहज़ादस निशि सूज़न

कँनीज़ वॉच़ मोसुम शाहस निशि तु सु ओनुन पानस सुत्य नोश लबि हुंजि माजि गुल बदन
बेगमि निशि। गुलबदन बेगम गँयि मोसुम शाहस वुछिथ स्यठाह ख्वश। स्व ऑस कोरि हुंज़
शेछ बोज़नु खॉतरु बे करार।

ब जल्दी कोरि हुंद पॉगाम वनतम
गँयस बे ताब नारस आब छुनतम

दोपुस तमि क्याह च़े छुय पॉगाम ओनुमुत
जिगर छुम बहरे द्वख़तर खून सपुनमुत

मोसुम शाहन वुछ तसंज़ बे करॉरी तु वोनुनसः

दोपुस तँम्य छम मे अँन्यमच़ सुत्य पानस
ब सख़्ती वॉत्य अँस्य बैयतुल अमानस
सफर योद सख़्त दून वॉरियन कोडुम कूठ
मे गँय कोठ्य छोट्य अद दौरान गमुक ज्यूठ

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

गुल बदन बेगमि लजि अँछ दरस। तमि कोर मोसूम शाहस ज़ारु पारु ज़ि मे करुनावतु कोरि हुंद दीदार। तस सुत्य वादु कॅरिथ द्राव मोसूम शाह तु ठ्युप ह्यथ आव वापस। माजि येलि कोरि हुंज़ हालथ वुछ, तस ज़ॅज वदन बाख नीरिथ। अथु थोद तुलिथ पोरनस दुआ तु नोश लब आयि पनुनि शक्लि मंज़ वापस। अमि पतु रॅट तमि स्व नालुमति तु कॅर्यनस म्वन्य तु मीठ्य।

वोदुख डीशिथ अँकिस अख माजि कोर्यव
त्रे तु मे वुछ तु दूर्यर क्याह ज़रुन प्यव
जुदौयी वुछतु क्या गॅयि ज़िंद पानय
लीखिथ ती ओस नाहक गव बहानय

माजि आयि नु पछ ज़ि मे वुछा कूर वारु कारु ज़िंदय। कोरि आयि नु पछ ज़ि मे गॅया बेयि माजि सुत्य मुलाकात। दूशवय येलि अख अँकिस लोल बॉगुरॉविथ म्वकलेयि, तमि पतु पृछुनस माजि ज़ि येम्य नफरन च़ु योर वातुनॉवनख, सु कुस छु तु कत्युक छु रोज़न वोल ? नोश लबि वोनूनस ज़ि सु छु नख्खाब मुल्कुक शाहज़ादु तु नाव छुस मोसूम शाह:

वनय क्याह क्युथ छु मॉलिस टोट फरज़ंद
ब ज़ॉरी छुन यि मॉगमुत अज़ ख्वदावंद
यि द्युतुमुत छुय तिमन मँग्य मँग्य ख्वदायन
वुछान ऑसिस तिमय छायन तु ग्रायन

अमि पतु बोज़नॉव नोश लबि मोसूम शाहन्य सारुय दॅलील माजि ज़ि तिमन किथु पॉठ्य सपुज़ पानुवॅन्य मुलाकात तु किथु पॉठ्य वॉत्य तिम योर। यि बूज़िथ सपुज़ गुलबदन बेगम मोसूम शाहस शुक्र गुज़ार।

यि मुश्किल गोम चाने सुत्य आसान
बु कॅरथस वारयाह ममनूने एहसान
दुबार ज़िंदगॉनी अज़ त्रे दिच़थम
फिदा सपनय मे लादन चॉन्य बड छम

मकबूल शाह क्रालुवार्य संज मसनवी दास्तान-ए-गुलरेज़ - नवि सरु लेखन वोल : म.क.रैना

गुलबदन बेगम ऑस तीन्न ख्वश जि तस आव नु पथ ब्रोंह किहिन्य लबनु। तमि कॅर अमी वख्तु नोश लब मोसुम शाहस हवालु जि गछ बु छसुनय त्रे पनुन्य कूर बख्शान। मगर मोसूम शाहस ऑस नु नोश लब मंज़ूर। तॅम्य दोपुस जि मे छु तस कुन बेनि गँज़रिथ वुछमुत। बु किथु ह्यकृ तस सृत्य खांदर कॅरिथ। म्यानि बदलु करतन स्व तॅस्य बुलबुलस हवालु येम्य सुंद दाग तसुंदिस दिलस मंज़ छु, तु यसुंदि म्वखु तॅम्य यीन्न खॉरी तुज।

गुलबदान बेगम गॅयि अथ कथि तैयार मगर दोपुनस अजब मॅलिकुन्य छम नु कांह खबर जि सु छा जिंदय किनु मूदमुत। दोपुनस सु ओस मे तुरकिस्तानस अंदर कुनुय ज़ोन अँकिस वॉरान जायि त्रावनोवमुत। तमि पतु क्याह गुदर्यव तस, मे छनु किहिन्य पताह। मोसूम शाहन वोनस जि अगर म्योन बोज़ख, अख कॉसिद करुन तैयार युस बहरीन मुल्कस गॅछिथ नाज़ मस्ति निशि पॉगाम नियि। मे छु पूर यकीन जि हरगाह अजब मलिक जिंदु आसि, सु आसि यकीनन नाज़ मस्ति समखुनि यिवान तु तवु किन्य आसि नाज़ मस्ति तसुंज़ पूर खबर।

नोश लबि ल्यूख नाज़ मस्ति खॉतरु खत। अथ खतस मंज़ ल्यूख तॅम्य पनुनि दिलुक हाल तु तस कॅरुन गुज़ॉरिश जि म्यॉनिस बालु यारस वातुनावतु म्योन पॉगाम। अथ खतस मंज़ थोव ज़न तु तमि पनुन दिल कॅडिथ:

वेसिये गुलन आवय बहार
अज़ सालु अनतन बालु यार
वॅल्य वॅल्य अनुन फॅल्य लालु ज़ार
अज़ सालु अनतन बालु यार
तस कुन मे कल छम राथ दान
छस तंबुलेमुन्न कर वुछन
यिमहस पतय तथ छुम नु वार
अज़ सालु अनतन बालु यार
परवानु रोयस गथ करस
तथ शमा रोयस तल मरस

मकबूल शाह क्रालवार्य संज मसनवी दास्तान-ए-गुलरेज़ - नवि सर लेखन वोल : म.क.रैना

छम कल तँहंज म्वल छुम नु हार
अज साल अनतन बाल यार

तँवील खत लीखिथ आव सु कॉसिदस अथि बहरीन मुल्कस मंज नाज मस्ति वातुनावनु।
नोश लबि हुंद खत पँरिथ होर तमि अँछव किन्य खून। कॉसिदस निशि लोग तस पताह
ज़ि अजब मँलिक ओस नँदरि मंजुय तुलिथ तुरकिस्तान वातुनावनु आमुत तु तमि पतु छनु
तसंज कांह खबर। वुनि ऑस नाज मस्त कॉसिदस सुत्य कथुय करान ज़ि अख वँनीज
आयि नाज मस्ति शेछ ह्यथ ज़ि अजब मँलिक छु बरस प्यठ वॉतिथ प्योमुत।

शेछ वॉतिथुय दोरेयि नाज मस्त देवानन हुंद पॉठ्य तु वॉन्न अजब मलिकस निशि। अजब
मलिकस ओस बुथ ज़रद्योमुत। नाज मस्ति रोट सु बाँय सुंद पॉठ्य नालुमति। तमि पतु
न्यून सु पानस सुत्य हरम खानस मंज तु पृछुनस हाल। अजब मलिकन वँनिनस पनुन्य
दँलील। दोपुनस बु तुलुहँस नँदरि मंजुय तु द्युतुहस अँकिस वॉरान जाथस मंज दॉरिथ।
मगर ख्वदायस ओसुस बु ज़िंदु थावुन तु तमी बचोस। बु फ्यूरुस तमाम आलुमस पनुनिस
दिलबरस वँन्य दिवान मगर सु ड्यूटुम नु कुनि, तु न म्यूलुम तसुंद कांह नेब।

अजब मलिकुन्य कथ बूज़िथ वँनिनस नाज मस्ति नोश लबि हुंज शेछ। तमि पतु होवनस
सु खत युस नोश लबि तस ओस सूजमुत। अमि पतु ल्यूख नाज मस्ति योरु खतुक जवाब
तु सुती ल्यूखुनस अजब मँलिकुनि तोर यिनुक वाकह तु तसुंद हाल।

बुलबुल गुलन छु गारन, परवान शमा छारन
बॉबुर हमेश लारन यँबुर ज़लन मुबारक
माह रोयि हाव नोन म्वख, ज़ांह कर बलन तिमन द्वख
जिगुरस लगन यिमन छ्वख, प्यठ त्योगुलन मुबारक

खत आव कॉसिदस अथि नोश लबि निशि सोज़नु। तमि युथुय खत पोर तस फ्यूर बुथिस
ग्वलॉब्य रंग। दोरान दोरान गँयि तु होवुन सु खत पनुनि माजि। तमि पतु बोवुन तस खतुक
मज़मून। गुलबदन बेगमि बुलोव मोसुम शाह तु वँनिनस सॉरुय दँलील। पतु वोनुन तस ज़ि
चु थोवुमख मख्तार, व्वन्य वनतम च्युय बु क्याह कर? मोसूम शाहन वँरनस नँसीहथ।

मकबूल शाह क्रालुवार्य सुंज मसनवी दास्तान-ए-गुलरेज़ - नवि सरु लेखन वोल : म.क.रैना

दोपुनस जु दिल पानुवैन्य मिलावुनस मंज गछि नु तौखीर युन करनु। अँस्य गछव माल व जाह, जहाज़ व सिपाह व सलतनथ ह्यथ मुल्के बहरीन तु करनावोख जु जान पानुवैन्य मुलाकात।

गुल बदन बेगमि आयि मोसूम शाहन्य कथ पसंद। स्व गँयि तु वँनिन यि कथ पनुनिस खानुदारस। दूनवय गँयि अमि कथि बापथ रॉजी जि नोश लबि गछि अजब मलिकस सुत्य खांदर करनुक इजाज़थ युन दिनु। मोसूम शाहस आव अथ रुतिस मशवरस प्यठ काँफी ज़र तु ज़ेवर दिनु।

प्रथ तरफ़ सपुद शॉदियानुक माहोल। नोश लब आयि पॉरावनु तु महारेन्य बनावनु। तस आयि कोफूर संदल तु अँत्र मलनु, तु शाहानु पोशाक तु ज़ेवर लागनु।

*प्रज़लवुन हूर बुथ ज़न नूरि मशाल
जि जलवह ऑस नेरान नारु वुज़मल
पँरी र्वख क्याह सपुन्य माह पैकराह ज़न
प्रयिवुन्य ख्वश यिवुनय पोशि थँराह ज़न*

अहलो अयाल तु महारेन्य ह्यथ द्रायि वारु कारु गुल बदन बेगम बैयतुल अमानु प्यठ तु वॉत्य मुल्के बहरीन। मोसूम शाह ओसुख सुत्य। येलि तिमव पनुन लशकर ह्यथ बहरीनस मंज कदम त्रोव, प्रथ तरफ़ वोथ शोर। नाज़ मस्ति हंदिस मॉलिस सिपाह सालारस वॉन्न शेछ जि नोश लब छि मोल मॉज ह्यथ शहरस मंज वाचमुच। सु द्राव पानु तिमन ख्वश आमदीद वनुनि।

अजब मँलिक आव मोसूम शाहस निशि तु वँरिनस ख्वरन मीठ्य।

*दुआ कोरनस ख्वरन तल त्रोवनस सर
त्रे बँलरोवुथ मे सोनमुत अँकुनुय ज़र*

मकबूल शाह क्रालुवार्य संज मसनवी दास्तान-ए-गुलरेज - नवि सरु लेखन वोल : म.क.रैना

अमि पतु आव खांदरुक संज करनु। नाज मस्ति हुंद मोल सिपाह सालार बन्यव गोबरु यँजमन। शॉही ज़ियाफतन हुंद आव इन्तिज़ाम करनु। महाराज़ आव पॉरावनु। मजलिसो महफिल आयि सजावनु। शरबतो शीरीं आयि वफूर बॉगरावनु। साज़ंदव सजाँव पनुन्य महफिल। नोश लबि हुंद मोल सपुद पनुन ज़ामतुर अजब मॅलिक वुछिथ स्यठाह मसरूर तु शाद। तँम्य मंगुनॉव्य कॉज़्य तु तिमव कोर अजब मॅलिकस नोश लबि सुत्यु निकाह। प्रथ तरफु सपुज शॉद्य तु पॅरियव लोग वनवुन।

मेति निखु तूर्य किनु च्यय यिख योतुये
दिल गोम मोतुये मेलख ना
कनु बोज वनुवुन क्याह छुय रुतये
दिल गोम मोतुये मेलख ना

यिथु पॉठ्य सपुद बाह वॅरी जुदॉयी तु तकलीफ तुलिथ अजब मॅलिकस तु नोश लबि म्युल। तिहँज़ि वॉरान ज़िंदुगी मंज आव नोव बहार:

ब-यकजा मील्य बॉबुर तय यँबरज़ल
ब फुरसथ बीठ्य छॉविख ही तु मसवल
द्वयव तशनु लबव चव वसलुकुय आब
फिराकुक राह चोलुख गॅय सब्जो सैराब

खांदरु पतु वॅर नाज मस्ति हुंद्य मॉल्य सिपाह सालारन नोश लबि हुंदिस मॉलिस मशहूर शाहस दावथ। मशहूर शाह आव अजब मॅलिक तु मोसूम शाह ह्यथ। सिपाह सालारन ओस कुस्मु कुस्मुक्यन ज़ियाफतन तु शरबतन हुंद इन्तिज़ाम कोरमुत।

मोसूम शाह द्राव मजलिसि मंजु न्यबर तु गव पोशि बागस कुन सॉलाह करनि। अति गॅयि अँमिस अँकिस ज़नानि हुंदि ग्यवनुच आवाज़ कनन। मोसूम शाह पोक ब्रॉठ कुन। दूरि वुछिन नाज मस्त वॅनीज़न मंज बिहिथ ग्यवान। मोसूम शाह वोट तस निशि तु द्वशवँन्य पेयि अख अँकिस प्यठ नज़र।

मकबूल शाह क्रालवार्य संज्ञ मसनवी दास्तान-ए-गुलरेज़ - नवि सरु लेखन वोल : म.क.रैना

येमिस तस कुन नज़र पेये तस येमिस कुन
सोनुख द्वशवैन्य दिलन तौसीर अँशुकुन
येमिस गुल रोये दिल गव पारु पारु
तँमिस मानंदे बुलबुल खारु खारु

द्वशवय गँय अख अँक्य सुंदिस अँशकस मंज़ गिरिफतार। वुछान वुछान गव तिमन लोलु नारु सुत्य गँयलु तु द्वशवय आयि पथर लायिनु। कँनीज़व तुल शोर। क्रख बूज़िथ आयि मजलिसि मंज़ बिहिथ लूख लारान लारान। कँह गँय नाज़ मस्ति निश तु कँह मोसूम शाहस निश। अजब मँलिकन रोट मोसूम शाह ख्वनि मंज़ तु दिन्नस शरबथ चैन्य। तमि पतु कोर तँम्य मोसूम शाहस निशि तसुंदि दिलुक राज़ मोलूम।

अजब मँलिक वोत सिपाह सालारस निशि तु वँनिस तस मोसूम शाह तु नाज़ मस्ति हुंदि अँशुकुच कथ। तमि पतु वँरुन तस गुज़ौरिश जि नाज़ मस्त गछि यिन्य मोसूम शाहस बख़्शनु। सुती कँर तँम्य नाज़ मस्ति हुंजि ल्वकचि बेनि मस्त नाज़ि हुंज कथ ति पनुनिस दोस्तस रासख सुंदि खौतरु। सिपाह सालार गव द्वशवुन्य कथन मंज़ रौंजी।

मोसूम शाहस सपुद नाज़ मस्ति सुत्य तु रासुखस सपुद मस्त नाज़ि सुत्य खांदर। पछस अँकिस रूद्य यिम अँती तु अमि पतु प्यव तिमन पनुन पनुन गरु याद।

त्रे बुलबुल गँय त्रे गुल ह्यथ हुस्नु वारे
त्रेयव तोतव नियख ज़ीनिथ त्रे हारे

त्रेशवय वॉत्य पादशाहन निशि तु वँरुख तिमन र्वखसथ दिनु खौतरु गुज़ौरिश। दोपुहख असि छु पनुनिस पनुनिस मॉलिस माजि हुंद स्यठाह लोल आमुत। अँस्य छि यछान पनुन पनुन गरु वापस गछुन युथ अँस्य पनुनिस मॉलिस माजि हुंद हक नखु वॉलिथ हेकवः

इजाज़थ गोछ करुन असि मेहरबौनी
सु हक नखु वालहव दर जिंदगौनी

मकबूल शाह क्रालवार्य संज मसनवी दास्तान-ए-गुलरेज - नवि सर लेखन वोल : म.क.रैना

बादशाहव द्युत वछि वॉलिंजि तिमन इजाज़थ:

*तिमव फरमोवहख छिव पानु म्वखतार
करुन असि शूबि नु अथ जायि इनकार*

सूती वॅर बादशाहव तिमन गुज़ॉरिश जि सानि कोरि छे नाज़व सूत्य पालनु आमचु तु युथ नु यिमन ज़ांह दिल फुटरॉविव। अजब मॅलिकन, मोसूम शाहन तु रासुखन कोर अथ कथि यकरार। सूती वॅरुख पनुन्यन गरिक्यन पनुनि वापसी हुज़ शेछ। अमि पतु आयि तिमन हुंदि नेरनुच सखर करनु। तिमन आयि खसुन्य कित्य गुर्य, शॉही ज़ांपानु, खज़ानु तु कुमती सामानु सूत्य दिनु। अजब मॅलिक तु रासख द्रायि नोश लब तु मस्त नाज़ ह्यथ तुरकिस्तान कुन तु मोसूम शाह द्राव नाज़ मस्त ह्यथ नख्शाब कुन। सॉरी वॉत्य पनुन पनुन मुल्क वापस येति त्युहुंद शाहानु इस्तेकबाल आव करनु तु तॅथ्य सूत्य आयि जश्न तु शॉदियानु करनु।



मकबूल शाह क़ालुवार्य सुंज़ मसनवी दास्तान-ए-गुलरेज़ - नवि सरु लेखन वोल : म.क.रैना

मकबूल शाह क़ालुवार्य सुंज़ लीछिमुन्न मसनवी
दास्तान-ए-गुलरेज़

Source: 'Gulrez' - compiled by Mohd. Yousuf Teng and 'Kashmiri Zaban Aur Shairi, Vol: 3' - authored by Abdul Ahad Azad, publications of J&K Academy of Art, Culture & Languages, Srinagar.

Condensed & Rewritten in Devanagari-Kashmiri by M.K.Raina

Work completed on 1.1.2005. Revised 15.11.2005
